

DIMIINU KADYÈNA DÌPYÀNA

PÀMWÈ NÈ CIZUBU NÀNSHA



Twánjààyi kushààla biimànyine kuulu bwà katanci kakesè kàà disambila. Twìnyikàayi mitù yètù.

² Nzambi munanga, tudi tubala eci bu dyèsè dinène, dilòòlò edi, dyà kwikala kaaba aka pa mpùnga ewu, bwà kufikisha Kilistò udi nè mwoyi ku buloba bùdì bùpùnga nè lufù nè lukòngò lwà bantu bàdì bàpùnga nè lufù.

³ Tudi baswè kulòmba, Mukalenge, bwà Ùlaabèku mēyi ètù nè diditácisha dyètù, bwà kabyàlukidi Kùdì munda mutupù nànsa, kàdì bikùmbajè bìdìbì bilongolwela bwà kwenza.

⁴ Kwacishaku mulùme yònsò, mukàjì yònsò, mwànà wa balùme, anyi wa bakàjì, mwab'ewu dilòòlò edi, udi mu lukèngelu. Nènku, Taatù, tudi bamanyè nè twètù bònsò tudi mu lukèngelu. Nènku patùumukà, dilòòlò edi, swàkù bwà tudyùmvwè mu myoyi yètù bu bàvwà bàfùminà ku Èmawùsè abu, paanyimà pàà . . . bamanè kupeta bujaadiki bwà dibìikà dyà ku lufù dyà Kilistò, bàmba nè: “Myoyi yètù kayìvwa yìlàkuka kapyà munda mwètù pàvwàYe wàkula neetù mu njila apu anyi?” Enzàku nànkù, Mukalenge.

⁵ Ondòpàku babèèdì nè beena ntàtu. Kakwìkadikù muntu nè butekète munkaci mwètù paanyimà pàà disangisha dilòòlò edi to. Nè kumutù kwà bintu byònsò, kakùshààdikù mwena bupidyà nànsa umwe to, Mukalenge. Swàkù bwà bònsò biitabuuje Mwoyi wà Cyendèlèlè, bwalu ke kiipacila kèètù kàà kudisangisha mwaba ewu.

⁶ Mabènesha aa tudi tuàlòmba bwà luumù lwà Bukalenge bwà Nzambi, mu Dìná dyà Yesù Kilistò, Mwànà wa Nzambi. Amen.

Nudi mwà kusòmbaayi.

⁷ Mbìmpè, dilòòlò edi, bwà kwikala baalùkile kaaba aka. Nènku ndi mmòna nè tudi nè ndambù wa bantu biimàne kuulu kaaba aka, nè ndi ngèèla meeji nè—nè maatèlèfonè mmakàngula mpindyewu, ku bimenga byàbùngì bishiilèshiiilàngàne byà mu ditùnga dijimà; mu San Francisco, mu Tucson, lwà ku esètè kwàka. Nènku twètù, kupicila ku tèlefonè, tudi tubàtùmina myoyi. Tudi mu dibàlaasà emu dilòòlò edi. Nè dibàlaasà dinène ndipàte patapata, nè mu tujila; nè kumpengà kwà bimanu, nkùle ne bantu biimàne kuulu. Nè tudi tuumvwa nè mààlabà dilòòlò netùteetè bwà kukàngula luseke lukwàbò elu, batàngile ku cibambalu cyà didiùbijidila, nè kupeta dibàlaasà dinène diikala mwà kwangata pàmwàpa bantu bakwàbò binunu bibidì. Pa

nànkú tudi batèkèmène nànkú, mààlabà dilòòlò. Dyòdì dyúle dilòòlò edi, dilòòlò dyà kumpàlà, mòna's, tudi twitabuuja nè neciikalè citàmbe bunène mààlabà dilòòlò. Kàbìdì ndi mmòna nè mbatèèkemù mikwàbò nkwasà, nè bintu byònsò, kàbìdì, dilòòlò edi.

⁸ Tudi nè myoyi yizùka bikolè; dyàmbedi, Dilwa dyà Mukalenge Yesù; cidi cilondà, lupàndù lwà...bwà misùùkà mijimine yivwà mifwànyine kuMwakidila dilòòlò edi nè kwikala badilongolòle bwà Dilwa Dyèndè pààmwenekàYe.

⁹ Ndi muswè kwela mwoyi wà pabwàwù nè kujingila difika dilenga kùdì bantu balenga bàdì pa cibùmbà cyà ku cyambilu eci aba, bândi ngumvwa nè bààbùngì bàà kùdìbo mbambi. Nkàmà yibìdì, anyi bàpìte apu, mbasòmbe pa cibùmbà cyà ku cyambilu, nènku tudi bushùwà nè kusàkidila bwà mùdìbo mwab'ewu.

¹⁰ Bwèndù nwèndù bantu bònsò, mwaba wònsò wunùdì nusanganyiibwa awu, mu bitùpà bishiilèshiiilàngàne byà ditùnga...Nè ndi ngumvwa nè bàmwè bàdì kaaba aka bàfùmina dyàmwàmwà dyà mbù, dyàmwàmwà dyà mbù. Pa nànkú tudi nè kusàkidila bwà kwikala kaaba aka bwà kusànkila bwobùmwe ebu pàmwè neetù, butùdì mu dindila nè myoyi yizùka bwà nè Nzambi neatùpetèeshè mu disangisha edi.

¹¹ Mbimwèke ànu bu nè, kacya ànu mbanga kwela meeji bwà kwalukila bwà matùkù makesè à masangisha aa, bwà nè mwoyi wànyì wùvwa mulàkùke mu mùshindù wà pabwàwù nè njiyà minène yà nè cintu kampàndà cidi ànu cyàmba kwenzeka. Ncyèna ànu mumanyè nè ncinyì to, kàdì ndi ntèkemena nè ndibùulula dinène dyà kùdì Nzambi, diikalà—diikalà mwà kutùlongolola nè kutwènzà beena mwàbò batàmbe bwimpè bàà Bukalenge Bwèndè patùdì twenda pa buloba bwà mîdimà bwà mpèkaatù ebu nè bupidyà apa.

¹² Buloba ebu dilòòlò edi, kaaba aka mene, mbulamè cintu cinène bwànyì mèmè. Kacya ànu ngàmanya nè mbiibàke dibàlaasà dyà cilongelu eci kaaba aka, ntu ànu muswè bwà kwenzelakù disangisha kaaba aka. Ndi nè kusàkidila kwàbùngì kùdì kasùmbù kalombodi kàà cilongelu nè kùdì aba bàdì batùpetèsheci nè musàngèelu.

Mùvwa mu citùpà eci, ànu lwà mwaba wùdì nzùbu ewu mwimàne dilòòlò edi ewu, mwàkenzekela cintu cinène kùkaadi bidimu bu makùmi àsàtù, ànu mu buloba bùmwebùmwe ebu mene. Kacivwa cingà cintu to ànu budimi bwà masele à mpoopu mu ciine cikondo aci. Nènku mvwa musòmbèle mu kazùbu kakesè ànu lwà mwab'ewu, mu ntàntà wa metèlè matwè ku nkàmà yibìdì. Mvwa mutàcishiiibwe bikolè mu matùkù awu bwà lupàndù lwà taatù wanyì nè maamù. Biinè abu, bònsò bàbìdì mbamanè kuya dilòòlò edi. Nènku nangànangà, mu ditùkù adi, mvwa mutàcishiiibwe bwà bwalu bwà taatù wanyì. Ndi mvùluka nè, mvwa mulààle mu lutanda. Kùvwa luuyà, mu muvù wà luuyà.

¹³ Eci ncifunda, ngèèla meeji, mu kakàndà kakesè kàdi kàbìkidiibwa nè *Yesù Kilistò Umweumwe Awu Makèèlèlè, Leelù, Too Nè Kashidi*, anyi cìvwa nànsa mu kakàndà kakesè kàbìkidiibwa nè: *Ncyàkashikukila Cikèèna-kumòna Cyà Mu Dyulu To*.

¹⁴ Nè pàmvwà mulààle mu lutanda apu, mèmè è kutàbuluka dyàkàmwè, ke bujitu kampàndà kulwabò ku mwoyi wànyì bwà taatù wanyì. Mùvwà, bààbúngì bàà kunùdi kaaba aka bàà mu cimenga emu bamanyè taatù wanyì, ngèèla meeji nè ùvwa muntu munè, nànsa mùvwàye ngènzàmpèkààtù amu. Nènku, kàdi ùvwa nè ciibidilu cibi, mu mùshindù wà nè ngàkateeta bwà kulwisha cintu aci nè mwànyì mwònsò, munda mwà bikondo, mbwena kwamba nè, kunwà kwà maalà. Nènku dilòlòlò adi ùvwa ùnwà maalà. Ke mèmè kutàbuluka nè bujitu bunène pa mwoyi wànyì bwèndè yèyè. Kàdi mwikale ànu nè pìjama wanyì pambidi, mèmè è kuvwàla mùpanù wànyì, è kushààla ànu nè cyà kuulu cyà pìjama pambidi; mvwa ngènda ngènda mu budimi bwà masele à mpooopu ebu, too nè mwaba wùdi nzùbu ewu mwashìibwe mpindyewu ewu, ke mèmè kutwà binù bwà kusambidila taatù wanyì.

¹⁵ Nènku pàmvwà munkaci mwà kusambila nè kulòmba Nzambi bwà kumusùngila nè bwà—bwà kubenga kumulekela ùfwa ngènzàmpèkààtù, bwalu mèmè mvwa mumunangè; nènku pàmvwà munkaci mwà kusambila apu, mèmè kujuuka bwà kutàngila lwà ku esètè kuumukila apa, nènku kùvwa cikèèna-kumòna. Nènku mwimàne ànu kumutù kwànyì menemene aku, bààbúngì bàà kunùdi mbamanyè cikèèna-kumòna aci, ùvwa m'Mukalenge Yesù.

¹⁶ Mpindyewu, mubidi kawùtu ùmvwayila ku bintu byà bidifwànyikijila to, bwà ku dyànyì dimanya. Kàdi bikèèna-kumòna bitu bilelèlè. Kàdi's ke Mukalenge Yesù awu mwimàne, musangu wà kumpàlà wùmvwàku muMumòne mu cikèèna-kumòna cyà mùshindù awu. Ùvwa ànu bu, kaa, pàmwàpa makàsà dikùmi kumutù kwànyì eku, mwimàne munkaci mwà lupeepèlè, nè dikàsà dimwè ànu munkaci mwà kwela cidya. Ùvwa mulwàte cìvwàlù citòòke, ciikàle nè dilendà dicinyùngùlùke ku luseke aku. Ùvwa nè nsukì miMufikile pa makaaya. Ùvwa ùmwèka bu uvwa, Muntu bu udi Bible wàmba nè ke mùvwàYe amu, nè bidimu bitwè ku makùmi àsàtù. Kàdi, Muntu mukesè, wa mubidi mukesè, mukesè menemene, ùmwèka bu nè kì mmufwànyine kwikala nè bujitu bupìte bwà kilò makùmi àsambòmbò to.

¹⁷ Ke mèmè kutàngila, nè mèmè kudyàmbidila nè kùvwa cintu kampàndà, cìmvwà mufwànyine kwikala mutùpàkàne. Ki mèmè—mèmè kudikùpula mu mèsù nè—nè kutàngila muulu cyàkàbidi. Nè ùvwa mwimàne bu mutàngile ku luseke, byènzè bu mutùme mpàla Wendè ku luseke. Nè lukebu lwà mpàla Wendè, lùntù mmònamona mu bikèèna-kumòna alu, lùvwa lwenzè bu

mutù wà Kilistò wà Hofmann mu bidimu makùmi àsàtù. Ki bwà cinyi ndi naaci mu nzùbu mwànyì, pa mikàndà yànyì yà dibala ayi, mwaba wònsò wùndiku mwà kucitèèka awu, bwalu mùshindù awu ke wùdici cìmwèka, citàmbe kwikala mùshindù awu. Cìkòlà, Yèyè ùvwa ùmwèka mukesè.

¹⁸ Nènku pàmvwà mwambùlùlè mèsù muMutàngila apu, mèmè kudyàmbidila nè: “Ncyà bushùwà nè ncyèna munkaci mwà kutàngila Mukalenge wanyì mwimàne mwaba awu to.” Mwaba mwenzè ànu bu, ndi mwà kwamba nè, mu ngiimànyinù ewu, nè pàmwàpa ànu mwaba wùdì eci, mwínshì mwaba wùdì cyambilu cìsanganyibwa mpindyewu ewu. Mwaba kampàndà, cìvwa ànu mu bitùpà ebi, lwà munda emu, mu ntàntà wa mwaba wùndì mwimàne ewu, nè mwànyì mwònsò mùmvwà mwà kupima amu, munda mwà metèlè makùmi àsàtù nè àsambòmbò anyì makùmi ànaayi nè àtaanu nè mwaba kampàndà mu citùpà cyà buloba emu, mu cijèngù eci.

¹⁹ Ke mèmè kubàndisha mèsù muulu, nè Yèyè ùvwa mwimàne mwaba awu. Ke mèmè kudisùma meenu ku munu, bwà kumòna ní mvwa mulàale tulù. Nudi bamanyè mùdì mwà... Bìmwèka ànu bu nè kabivwa mwà kwikala nànkù to. Nè ncìvwa ànu nsongà mu Mukalenge mwine musangu awu, mvwa nyiisha kùcìvwa ngondo mitwè ku yisambòmbò nànkù awu. Mèmè kudisùma mènù ku munu. Mèmè è kwangata disele dyà mpoopu nè kudicìbulula. Nè bààbùngì bàà ku nwènù bàdì basòmbèlè ku musòko, nudi bamanyè cidì kaci kakesè kàà dyela ku meenù aku, bu mùdì, kàtù mu masele à mpoopu. Mèmè kubanga kukàcyànkunya. Ke mèmè kwamba nè: “Kabyèna—kabyèna mwà kwenzeka to. Ndi munkaci mwà kulòòta. Nzùbu wanyì nyèyè wàwa. Taatù, maamù, nè bânà mbòbò aba kuntwaku. Ki dijiba dyà kale lwà ku nzùbu wa màdyòtù uvwa lwà kwínshì eku dyàdya, kùmvwà nè ciibidilu cyà kulemba mabata, ànu mu ntàntà wa metèlè matwè ku lukàmà nè makùmi mwandamukùlù kupita apa. Nènku’s ke mèmè ewu mwimàne mu budimi; bìvwa nè cyà kwikala nànkù.”

²⁰ Mèmè kutuuta dikàsà panshì, kutwà mikùmà ndambù, nè kunyùkusha mutù wànyì, nè kubùnya byanza byànyì, kwambulula mèsù cyàkàbìdì; kutàngila, kutàngila cyàkàbìdì, nènku’s ke Yèyè awu mwaba awu, mwimàne mwaba awu. Nè lupeepèlè kubangalù kutuuta, nè mèmè kumòna budimi bwà mpoopu abu bùpeepa. Pààkabangàbu kupeepa, bìvwàlù Byèndè kupeepabì pàmwè naabù. Byènzè bu bilàmbà bilembeleja ku nshinga kampàndà, kubangabi ku—kudituuta. Ùvwa mwimàne mwaba awu. Mèmè kucitàngila.

²¹ Ke mèmè kudyàmbidila nè: “Ngíkalapù nànsha ànu mwà kuMutàngila kwísù’s wè!” Nè Yèyè ùvwa mutàngile ku esètè, ànu mu mùshindù ewu. Yèyè ùvwa munkaci mwà kukùtàngila, mukùbàngidile. Ke mèmè kutentemuka, bwà kwela cidya kunyùnguluka, bwà kutàngidila mpàla Wendè pabwìpi. Nènku

ncìvwa ànu mwà kuMumòna bîmpè menemene to. Ûvwa nè byanza Byèndè kumpàlà Kwèndè, bu bisokoka bwà mwaba wûmvwà mwimànyine awu.

²² Mémè kunyunguluka cyàkàbìdì. Nè mémè kutàpa kakosò, cintu bu nûnku ewu, kwenza nè: “hum,” bwà kumòna ní mvwa mwà kukòka ntèmà Yèndè. Kàdi Yèyè kààkanyungakù to.

²³ Pashìishe mémè kudyàmbidila nè: “Pàmwápa nêMubiikilè.” Pangàakambà nè: “Yesù,” Yèyè kukùdimuna mutù Wèndè. Nè pààkantàngilàYe, Wàkoolola ànu mabòkò Èndè. Ke cyònsò cìndì muvùlùke. Mu ntàntà wa, pabwîpî nè kwîsù kutòokakù, mvwa mulàadile ànu kaaba aka mwaba kampàndà wùdì mwab’ewu wùsanganyibwa mpindyewu ewu, mu budimi abu; mutèèlù wà pijàmà wanyì mubolèbolàà nè binsònjì, mûmvwà munkaci mwà kudila mwadi. Nè ncìcìvwa mumanyè cintu to.

Kwîsù kwèndè kùvwa nè lukebu lùvwà muzòdì nànsa umwe kàyì mwà—kàyì mwà kuzòla anyì kuzòla nè bùloosù to. Kabàvwa mwà kucyènzà to. Ûvwa ùmwèka bu Muntu uvwa, bu wèwè mwà kuMutàngila, uvwa mwà kudila bwà luse, nè kuneemeka nè kaneemu kààbúngì; kàdi nànsa nàнку mwikàle nè bukolè bwà, mufwànyine kwakula, bufwànyine kukùdimuna buloba. Nè ngiikàdilù yà lukebu yìvwà kayiyiku mwà kubàkudiibwa kùdì muzòdì to.

²⁴ Nènku kacya ncìvwakù mumanyè too nè leelù ewu cìvwàci cyùmvwija to. Kàdi’s ke mémè ewu dilòlò edi, paanyimà pàà bidimu makùmi àsàtù, mwimàne mu dibàlaasà dìdì dilàmbùdiibwe mpindyewu ku mudimu wà Nzambì wa Bukolè bwhònsò. Nè mémè, ànu cidimba cyà—cyà èkèleeziyà, mu bushwà bwà bwalu, ànu mukùlù wa—wa pa kaaba mu—mu èkèleeziyà wa ba-Baptistes emu, mùvwà Roy Davis mwikàle mpaasàtà mwinè musangu awu. Nènku mmémè ewu mpindyewu mwimàne mu mwaba ewu mukùta kùdì bantu, ànu pa buloba bùmwebùmwe abu, mwikale nè. . .cìndì mémè ngèela meeji nè, mbapikùdiibwe bàà Mashi à Yesù Kilistò Yèyè mwinè, mu byanza byànyì, bwà kutwàla Mukenji wà matùkù ànaayi wà Mukalenge ewu.

²⁵ Ngondo mitwè ku yìsambòmbò paanyimà pàà cyòcì aci, ngàkapeta dibàtiiza dyànyì dyà kumpàlà ku musùlù eku, pààkapwekà Bukènkè ànu mwab’ewu mene mu Mùsèèsù wà Spring emu. Bààbúngì bàà kunùdì nwènú mbafwànyine kujinga kupweka bwà kwòshakù dîsù, ku Mùsèèsù wà Spring nè mâyì, bàtàngile buludì ku musùlu awu. Nènku’s ke mwaba awu wàkamwènekà Mwanjèlò wa Mukalenge bantu bitùùle, dyàmbedi, nè pa díbà ibìdì jaajaaja, mu mapingaja kampàndà. Nè Dîyì kufùminamù, dyàmba nè: “Ànu mùvwà Yone Mubàtiji mutùmiibwe bwà kudyànjidila Dilwa dyà kumpàlà dyà Kilistò amu, mukenji wèbè wèwè newùdyanjidile Dilwa diibìdì.”

26 Ke twètù aba bidimu makùmi àsàtù bimanè kupìta, kàdi's mmémè ewu ncìdì ànu, dilòòlò edi, munkaci mwà kukòbola Mukenji awu. Nè pa buloba bujimà Wòwò mmuyè, nè ndi nè disànkà dyà kwikala mwalùkile mu cimenga cyànyì kwetu, dilòòlò edi, bwà kuleeja Mukalenge Yesù Kilistò ewu ùncidì ànu munangè nè mwoyi wànyì wònsò. Ditùku dyònsò Yèyè ùdi ùtamba kuvwijiibwa ànu wa kalolo kutamba mùvwàYe ditùku dishààle. Kacya ncitukù mwànji kushintulula katòba nànsha kàmwè mu Dilongesha dyànyì to. Cintu cyà kumpàlà cìmwà mbungè naacì, ncìdì ànu ngìtabuuja cintu cìmwècìmwè aci dilòòlò edi. Yèyè ùdi umweumwe awu makèèlèlè, leelù, too nè kashidi. Mpindyewu ndi nè Mukenji wùndì mwambwile bujitu.

27 Pàakabanga Mukenji dyàmbedi, ùvwa nè, mu bushùwà bwà bwalu, bantu bònsò...mvwa nsambidila babèèdi, bimanyinu binène, maalu à kukèma, nè bishimà, byàkabanga, nangàangà mu beena Mpenta, ditàbuluja dyà buloba bujimà dyà tumpanye twà dyondopa twàkanyungulukà pa buloba bujimà. Munda mwà bidimu dikùmi nè bitaanu bishindàme kùvwa matàbuluja pa kakùnà nè kakùnà kònsò kàdiku aku, ngèla meeji, tupyà twà ditàbuluja tùvwà munkaci mwà kuteema. Miliyò yà bantu ànu yètù yà cyà bushùwà eyi mbiitàbe Kilistò bu Musungidi wabò, ku mudimu muntùma naawù wùmwèpelè awu. Wòwò awu wàkasonsula, kuumukila kuntwaku, kuyà kùdì Oral Roberts, nè bakwàbò, bitungunuka ànu nànkù, pàvwàwu wènda wùnyunguluka apu.

28 Pashìishe, èkèleeziyà wa Mpenta ùdi ùshààla mu tulù twèndè bu mufwè atu, ànu mwàkadìbi kale wàwa amu. Meeji àànyì nè dijinga dyànyì, dilòòlò edi, mbwà kutàbuluja èkèleeziyà awu, cyàkàbìdì, bwà Dilwa dyà Mukalenge Yesù didì pabwìpì edi. Ndi nè cyà kumutàndisha. Ndi nè cyà kutàndisha mpèkaatù mu mùshindù kanà wònsò wùdiye. Ncyèna nè meeji à kuciludikila dingumba dyà muntu nànsha umwe to. Ndi nè Mukenji.

29 Mpindyewu, mbikolè bwà kubwela mu èkèleeziyà bwà ditwà dyà nyama ku mikòlo, ànu mwàkadìbi nè Mukalenge wetù Yesù amu, bwalu n'Yèyè; kì mmémè to. Kàdi bu mwàkayiiishàYe dyàmbedi, nè kwondopa babèèdi, kubiiisha bafwè, nè kukezula beena nsudì, kwipata baadémons, bantu bònsò bàvwa baMuswè. Kàdi kùlwalwa cikondo cìikalà Mukenji wùlonda misangu yònsò cimanyinu cyònsò, bwalu cimanyinu cìdì nè dīyī.

30 Kàdi pàakasòmbàYe dīngà ditùkù, wàmba nè: “Mémè nè Taatù Wanyì tudi Umwe,” aci's cìvwa citàmbe nè cìvwàbo mwà kutwàla. Cìvwa, kàbìdì, pàakambàYe nè: “Nwènù kanùyì badyè mubidi wa Mwànà wa muntu nè banwè Mashi Èndè to, kanwèna nè Mwoyi munda mwènù to.”

31 “Munyi?” Mòna's, bangàngàbukà nè bantu bàà ngeelèlù wa meeji mwìmpè bàvwa bafwànyine kwikala bambè nè: “Muntu ewu mmukishi munù wa mashi à bantu, ùteeta bwà

kunùfikisha ku didyà mubidi Wèndè nè kunwà Mashi Èndè.” Yêyè kààkacyùmvwija to. Wàkacyàmba ànu cyanàànà.

³² Nènku dilòlò edi nudi bafwànyine kutèèleja bintu kampàndà, nè mu masangisha emu, bìdi ànu byambiibwe. Tudi bafwànyine kupanga mwà kuumvwija. Kàdi, vùlukàayi nè, Yesù Kilistò ùdi umweumwe awu makèèlèlè, leelù, too nè kashidi. Tudi tuciitabuuja.

³³ Mpindyewu, katwèna nè dībà dyà kwakula bipitèpìte búngi to, bwalu tudi nè mèbà kampànda bwà kutwàdija mwab’ewu nè mèbà kampànda bwà kupàtuka. Nè tudi baswè kufila bunèmè kùdi kasumbù kàà balombodi bàà cilongelu bàdi batutèèkèle bikondo ebi, nènku netwènzè cyònsò citwìkalà bwà kwenza bwà kubàpa bunèmè.

³⁴ Vùlukàayi nè, pa dībà kanà dyònsò didi ngènzàmpèkààtù muswè kulwa kùdi Kilistò, cyònsò cìdi cikèngela bwà wèwè kwenza nkujuuka buludi, nànsa mèmè nyiisha, ngimba misambu, cyònsò cìdici aci, nè kufila mwoyi wèbè kùdi Kilistò ànu pa dībà adi mene, kujuuka mu nkwaswa webè amu. Ke citùdi balwilè kaaba aka, mbwà kunùkwàcisha.

³⁵ Ndi muswè kuyiikila nè Mwanèètù Vayle, Mwanèètù Rober-... Borders, nè bānà bèètù aba. Bu... Ndi ndikonka ní kabāvwa mwà kwikala nè, mu èkèleeziyà amu, mu mapingaja, anyi mu dindà kampàndà amu, anyi cintu kampàndà, mudimu wà dileeja dyà njila bwà aba bàdi bàkèba dibàtiiza dyà Nyumà Mwimpè abu. Aci ncifwànyine kù kwikala cimpè anyi, nwènù bānà bèètù? Mwanèètù Neville nè nwènù bònsò bàdiku mwà kafikakù, nè Mwanèètù Capps. Muntu yêyè muswè bwà bāmuleeje njila ku dibàtiiza dyà Nyumà Mwimpè, bwà cinyi kùyikù ulwa mu tabernacle... Ncinyi cìdi cifwànyine kwikala citāmbe bwimpè, mu dindà anyi mu mapingaja?

³⁶ [Muntu kampàndà ùdi wamba nè: “Dindà.”—Muf.] Dindà, lwà pa dībà dikùmi jaajaaja? Lwà pa dībà dikùmi jaajaaja wa dindà.

³⁷ Nwènù nè lukonko pa Dilongesha, nwènù nè lukonko pa Diyiisha, nwènù—nwènù baswè kwikala... bōbò kabàyikù bānji kukukwàcisha to, pàà nkààyeebè, wèwè muswè bwà bàkusambidilè, anyi cintu kampàndà cyùdi muswè kumanya cyà mu mùshindù awu, bwà cinyi kwènà mwà kudifindakù kupwekakù pa dībà dikùmi jaajaaja wa dindà nè kumòngana nè bantu aba? Nkwìkalè umwe anyi bààbúngi bàà kùdìbo kuntwaku bwà kunuleeja cyà dyenza, bwà kusambidila babèedi, bwà kwandamuna nkonko. Ànu bu muntu nkààyà, èè, yêyè... Wèwè ndà ànu kùdìbo, nè bōbò nebìikalè nè disànka dyà kukukwàcisha mu mùshindù kanà wònsò wikalàbo bafùdishe awu.

³⁸ Mpindyewu, ànu kumpàlā kwà twètù kuseemena ku Diyì, tudi baswè kuseemena cyàkàbìdi kùdi Mwena Diyì.

Udi mwà kudyà kupicisha; udi mwà kunwà kupicisha; udi mwà kuseka kupicisha; udi mwà kwenda kupicisha; kàdi kwàdyàkusambilakù kupicisha to. “Ndi muswè bwà balùme bàsambilè myaba yònsò, beelee byanza byà cijila muulu kakùyì mpatà anyi cijì cikolè to.”

Tùsambilàayi.

³⁹ Yesù munanga, Mwena Dîyì dyà Mwoyi, nè Wèwè udi Dîyì adi, tudi tuseemena kakùyì tuseku to mpindyewu pabwîpì Neebè paanyimà pàà dyumvwija dyà cikèèna-kumòna, cyà nè, Nzambì, Wèwè udi umfidila bujaadiki nè aci ncilelèlè. Mukalenge Yesù, ndi ndòmba bwà Wèwè kulaaba mèyì aa dilòòlò edi ku dyumvwa dyà dicit dyònsò diti mwînshì mwà cyonà cyà Nzambì. Nènku kwòkò kwikàle bàmwè kaaba aka, anyi munkaci mwà kutèeleja, mu ditùnga dijimà emu, bòbò kabàyi pabwîpì nè badìlongòlòle pa dîbà edi bwà kutwilangana nè kadyòmbò kàà dîbà edi, Mukenji wà kùdì Nzambì, bwà kunyingalala nè kwikala badìlongòlòle, bwalu Bukalenge bwà Nzambì bùkaadi pabwîpì. Tudi tulòmba bwà biikalèku nànkù, dilòòlò edi, bwàbu bòbò, bwà bààtwilanganakù nè kadyòmbò kàà dîbà edi.

⁴⁰ Éyì Nzambì, ndi mufwànyine kulòmba dikwàcisha, mumanyè bujitu bwambula nè cidibu bùumvwija, nè cindì nè cyà kwandamwina ku Ditùkù dyà Cilumbulwidi, bwà byònsò bìndì ngàmba kaaba aka nè myaba mikwàbò. Nkwàcishèku bwà ngiikalè nè meeji matòòke à menemene, Mukalenge, nè byònsò bìndì ngèza anyi ngàmba mu Dîyì Dyèbè, bwà byàmòna mwà kukwàma mamuma. Bwalu, ànu mùvwà mudimu Wèbè mutùtùma naawù nè: “Dîyì edi kadyùmukukù mukana mwèbè to; kàdi elàngànàpu meeji, muunyà nè butùkù, bwà ùmonà mwà kulonda bwà kwenza byònsò bìdì bifùnda mu mikenji. Nènku dîbà adi wèwè neùtancishè njila yèbè, nè dîbà adi neùtuutè dyàkalenga. Ncyènakù mukutùmine dîyì anyi? Ikàlà nè dikàndà nè bukitù bwàbùngi, bwalu Mukalenge Nzambì webè ùdi neebè kwònsò kùyaaya.” Mukalenge Yesù, cìvwijèku nànkù, dilòòlò edi. Tudi tulòmba mu Dînà dyà Yesù. Amen.

⁴¹ Mu diitànù nè mu diisambòmbò, kuumukila pa dîbà dikùmi too nè ku dikùmi nè ibidì, ku tabernacle mu Mùsèèsù wa 8 nè wa Penn, nekwikalè dileeja dyà njila, mandamuna ku dilongesha, masambila bwà babèedi, nè bikwàbò. Pwekà wèwè ànu buludì ní udi nè lukonko kanà lwònsò, cyònsò cyùdì naaci dijinga aci. Nekwikalè bantu kuntwaku bwà—bwà kutàngila bwalu abu. Mukalenge àkubènèshè.

⁴² Mpindyewu, bwà disangisha dyà dikàngula naadi edi dilòòlò edi, ncyèna mwà kwenza cintu nànsha cimwè to ànu kudikàngwila buludì ku Mukenji wètù. Ke citùdì balwilè kaaba aka, nè mpindyewu ke cyòcì cindì mwalùkidile.

Nènku mu dyàlumingu mu dindà, bu Mukalenge mwà kwanyisha, ndi muswè kutuutakeena nè kadyòmbò kanène kàà

ditùkù edi aku, bwà *Dibàkà Nè Difwà Dyà Dibàkà*.

⁴³ Mpindyewu, mu Galàtiyà 4.27, ndi njinga kubala Méyì aa, 4.27 too nè ku 31, mukùmbajilakù.

Bwalu bààkafùnda nè: Sànkà, wèwè mukàji nkumba udi kùyi ulela; tùdikà nè mwadi ùdilè, wèwè udi kùyi udinyènga bwà kulela: bwalu udi mubungame ùdi nè bânà bààbúngi kutàmba ewu udi nè mulùme.

Mpindyewu twètù, bânà bèètù, ànu mwàkadì Izàkà amu, tudi bânà bàà mulayi.

Kàdi ànu mùvwàbi díbà adi nè ewu uvwa mulediibwe bilondèshìle mubidi ùvwa ùkèngesha ewu uvwa mulediibwe bilondèshìle Nyumà, ke mùdìbi kàbìdì mene mpindyewu.

Nànsha nànkù mufundù wùdi wàmba cinyi? Ipàtà mukàji mupika nè mwanèndè wa balùme awu: bwalu mwànà wa balùme wa mukàji mupika kààkwikala mupyànyi pàmwè nè mwànà wa balùme wa mukàji mudishikàmìne to.

Pa nànkù, bânà bèètù, twètù katwèna bânà bàà mukàji mupika to, kàdi bàà mudishikàmìne awu.

⁴⁴ Mukalenge àsakidileku mabènesha Èndè ku kubala kwa Dìyi Dyèndè. Mpindyewu, ndi ngèèla meeji kaaba aka nè ndi ngàngata cyena-bwalu bu eci, cyà pabwàci menemene, cyà pabwàci. Kàdi mîngà misangu tudi tusangana Nzambi mu mèbà à pabwàwù awu, àdi kaàyi à ciibidilu awu, mîshindù yà pabwàyi, bintu byà pabwàbi abi, bwalu Nzambi ùtu wa pabwèndè. Nè bôbò bàtù bàMusadila bulelèlè mu mwoyi wàbò abu, bàtu bàMusadila mu mùshindù wà pabwàwù, mushiilàngàne nè mîshindù yà bàà pa buloba. Cyena-bwalu eci cidi cìbìikidiibwa nè: *Dimiinu Kadyèna Dipyàna Pàmwè Nè Cizubu Nànsha*.

⁴⁵ Pòlò mwaba ewu ùdi wàkula bwà dimiinu dilelèlè dyà bânà bàbìdì bàà Abraham. Pòlò, nè disànkà dyònsò, ùdi ùdibweja mu mwaba wà dilediibwa dyà kùdi mukàji mudishikàmìne.

⁴⁶ Mpindyewu, tudi bamanyè nè Abraham ùvwa nè bânà bàà balùme bàbìdì, bàà kùdi bakàji bàbìdì bashiilàngàne. Nzambi wàkamupèèsha mulayi kùdi Sarah, ku Sarah, èyowà's wè, bwà nè nekwikalè Mwànà wa balùme wàlediibwa, nè kupicila ku yèyè Mwànà ewu buloba nebwikalè bubènèshiibwè. Matùngà ònsò àvwa mwà kubèneshiibwa kùdi Mwànà ewu. Nè nciitabuuyiibwe kùdi bantu bònsò, nangananga munkaci mwà beena Yudà, bwà nè yèyè ewu ùvwa Izàkà, kàdi kàvwa yèyè awu to. Mwànà mulaya wa Abraham ewu n'Yèsù, nè Yèyè ngwa ku mulayi wà Dimiinu dyà Bukalenge, dyà Abraham. Kàdi Abraham mwikalè nè bânà bàbìdì. . .

⁴⁷ Umwe, kùdi—kùdi Hagàà, uvwa mwena mudimu wa mukàjeèndè; mwena mudimu mukàji mwena Èjiipitù, wa maalu

malenga, mwîmpè kumòna, uvwa Abraham mumutwàdile mu Èjiipitù mwàmwa, bwà kwikala wendè...mwena mudimu wa mukàjèèndè. Nènkù Sarah, wèla meeji nè Nzambì kàvwà mwà kwikala mukùmbàne bwà kulama mulayi Wèndè wònsò mulelèlè, wàkambila Abraham bwà kwangatayè Hagàà, mwena mudimu wendè mukàji awu, nè kumusèlayè, (bwalu, disèlè dya bakàji bààbùngì divwa diitàbiibwe kùdi mikenji mu matùkù awu) nè bwà kulela mwànà awu; nè mùshindù awu ngùvwà Nzambì mumulongòlwèlecì, bwà nè ùvwà nè cyà kupetela mwànà awu ànu ku Hagàà. Kàdi tudi tusangana nè kabìvwà nànkù to.

⁴⁸ Mpindyewu tudi tuumvwa, kàbìdì nè, Nzambì mmupwàngàne mu isàtù. Mpindyewu, Nzambì ùdi “mupwàngàja” mu isàtù. “Ngàsà” ùdi itaanu. *Mwandamutekète* ùdi “dyoya,” bu mùdi bàà pa buloba.

Nzambì mmupwàngàne mu Taatù, Mwànà, Nyumà Mwîmpè. Ke bupwàngàne bwà Bunzambì mbwòbù abu. Bònsò Nzambì umwèpelè, mu mamwèneshiibwa àsàtù, à byambiibwà bisàtù byà mudimu ùmwèpelè, anyi midimu yisàtù mu Bunzambì bùmwèpelè.

⁴⁹ Mpindyewu, kùdi kàbìdì bisàtù mu bupwàngàne, ku bidya byà ngàsà, bwà Èkèleeziyà; dibingishiibwa, dijidiibwa, dibàtiiza dya Nyumà Mwîmpè. Aci ncilààle ku Dilediibwa Dipyadiyà adi, ànu mùdi dilediibwa dya mu bufùki dileejiiibwe ku cyòci aci amu. Bwalu, pàdi mukàji ulela mwànà apu, cintu cyà kumpalà cidi cipàtuka mmâyì, mashi, nè pashiishe mwoyi.

Bible mmwambè, mu Yone wa Kumpalà 5.7, anyi 7.5, ngèèla meeji nè mmwòmò, wàkamba nè: “Kùdi bàsàtù bàdi bàfila bujaadiki mu Dyulu; Taatù, Diyì,” ùvwà Mwànà, “nè Nyumà Mwîmpè; bàsàtù aba bàdi Umwe. Kùdi bàsàtù bàdi bàfila bujaadiki pa buloba;” Diyì nè: “mâyì, mashi, nè Nyumà. Mâyì, mashi, nè Nyumà; bisàtù ebi bìdi *byumvwangana* mu umwe.”

⁵⁰ Mpindyewu, Taatù, Mwànà, nè Nyumà Mwîmpè, bàdi Umwe. Kwèna mwà kwikala nè Taatù kùyì nè Mwànà to; kwèna mwà kwikala nè Mwànà kùyì nè Nyumà Mwîmpè to. Kàdi udi mwà kwikala mubingishiibwe kùyì mujidiibwe to; udi mwà kwikala mujidiibwe kùyì muujiibwe tètè nè Nyumà Mwîmpè nànsha. Tudi bashindike cyòci aci ku bulongàme bwà mu bufùki.

⁵¹ Mpindyewu, nè bààbùngì bàà kunùdi, pàmwàpa, ndi mwà kwikala mwenyi kunùdi. Nènkù mèmè—mèmè ncyèna nè kàlaasà kalonga to; ndi mutwishiibwe nè nukàadi bamanè kuumvwa. Kàdi ndi ndongeshila mu bifwànyikijilu, bu mùdi byà mu bufùki bifwànyikija byà nyumà.

⁵² Mpindyewu, tudi tumòna nè kùdi bàsàtù mu bupwàngàne. Nzambì mmupwàngàne mu isàtù, mpindyewu. Nè aci civwa, mu bupwàngàne bwà dimiinu dya Abraham, civwa Ishàmèèlè, Izàkà, Yesù. Ishàmèèlè ùfùmina ku mukàji mupika, Izàkà ùfùmina ku

mukàjì mudishikàmine, kàdi bùbìdì bwàbò biikàle nè disangila dyà mulùme nè mukàjì; kàdi Kilistò Yesù ùdi ùfùmina kùdì virgò, kakùyì disangila dyà mulùme nè mukàjì to.

⁵³ Apa, “Dimiinu,” òmwè, Dimiinu òmwèpelè; kî mmamiinu to, kàdi Dimiinu òmwèpelè. Makwàbò aa kaàvwa dimiinu dyà Abraham to, bwalu “Dimiinu” dyà Abraham òvwa n’Dimiinu dyèndè dyà diitabuuja òvwa Nzambì wàmba adi, kî ndimiinu dyèndè dyà mu mubidi to. Bwalu, paanyimà pàa Sarah mumanè kufwà, Abraham wàkasèla mukàjì mukwàbò nè kulelayè bàna bàà balùme mwandamutekète, pa kuumusha bàà bakàjì. Pa nàнку kaciwa mwà kwikala mamiinu à Abraham to, cìvwa “n’Dimiinu” dyà Abraham òmwè. Nè yèyè awu ùvwa Dimiinu dyà diitabuuja dyà Abraham, ùfunkuna Dimiinu dyà Bukalenge òvwa nè cyà kulwila ku diitabuuja dyà Abraham adi; kaciyyì mwoyi wà mu mubidi wà Abraham to, kàdi mwoyi wà mu nyumà wà Abraham; wàkangata bintu byònsò bìvwa bibèngangana nè Dìyì dyà Nzambì abi kàdi kubibìkila bu nè kabìvwaku to, nè kwitabuujayè Nzambì; bibèngangana nè ditèkemenà, kwitabuuja mu ditèkemenà. Ke Dimiinu dilelèlè ditùdì twamba ndyòdì adi.

⁵⁴ S’ki twètù aba baleejìibwe nè cimfwànyì. Kaa! Dimiinu dyàkabanga, dimiinu dyà mulayì, dyàkabanga mu mpatà kakesè, mpatà yà mulayì wà ku cibangidilu awu. Nudi numòna mùdibi bìbanga bitekètebitekète, mu mpatà ku mulayì wà ku cibangidilu awu. Nzambì wàkalaya Abraham, bwà kupetela mwànà ewu, ku Sarah. Kàdi mpindyewu tàngilàayi, dimiinu dyàkumpàlà dyà Abraham ku mukàjì mupika dyàkalwila ku dyela dyà mpatà dyà Sarah nè eci kaciwa mwà kwenzeka to, bwalu ùkaavwa mukùlàkàje nè mupicishe cikondo cyà kulela.

⁵⁵ Mindyewu awu’s ke mùshindù wùtù èkèleeziyà ùtwàdija. Ke mùshindù wùtùye misangu yònsò ùtwàdija. Udi ubangila kwìnshi. Kwèna ubangila ku lusongo to. Muntu udi uteeta bwà kubànda ku cibàndilu, kàdi udi uteeta bwà kufika ku lusongo dyàmbedi, nèàcibukè nshìngù. Bìkèngela ùbangè nè wìbakè wenda ubànda too nè ku cyòci aci.

Nènku apa tudi tusangana cibangidilu cyà mulayì wà Nzambì munkaci mwà kumwèneshiibwa, kupìcila mu mpatà mikesè, kukòsolola ndongamu wa Nzambì.

⁵⁶ Mùshindù wùmwèwùmwè awu ke wàkabangà mpèkaatù mu budimi bwà Edènà. Mùshindù awu ke wàkabangà lufù ku mpèkaatù, mpààkuumvwijìibwà Dìyì òmwè dyà Nzambì bibì anyì kwediibwadi mpatà. Kwèna mwà kwela mpatà anyì kutèeka Dìyì nànsa òmwè dyà Nzambì mwaba ùdi kawùyì wadi to, aci ng’EMU MMŪDÌ MUKALENGE WÀMBA, bwalu Dìyì Dyèndè dyònsò didi nàнку.

⁵⁷ Nènku apa Sarah, nànsa mwìnè udi mulayì (Sarah mwikàle mukàjì, udi cìfwànyìkijilu cyà èkèleeziyà awu), wàkeela mpatà

ku ndongamu wa ku cibangidilu wa Díyì dilaya dyà Nzambi, nè kwamba nè: “Wèwè, Abraham, bàyaanyi, angàtà mupika mukàjì mulenga kwìsù ewu, ùshaalè nendè, nè wikalè bàyendè. Nènku Nzambi neàfidilè dimiinu dyà mulayi edi kùdiye, nè nèngàngatè mwànà awu.” Nwamònu’s, ùsambuka ànu katòba kakesè cyanàà, è kushintululaci ndongamu mujimà.

Ki bwà cinyi, bidi bikèngela bwà twètù kwangata Díyì dyònsò dyà Nzambi bu EMU MMÜDÌ MUKALENGE WAMBA. Díyì dyònsò dyà Nzambi ndilelèlà.

⁵⁸ Apa dimiinu didi dìbanga díbà adi mu mulayi, mwela mpatà kakesè. Izàkà mwikàle dimiinu dyà mukàjì mudishikàmìne nè mulayiibwè, kutwàlayè, bu mwàkadì Pòlò ùteeta kuumvwija apa mu Beena Galatia, wàkalela dimiinu dyà mu bufùki, dilayiibwè adi. Nènku ùdi ùtùngunuka nè kwamba mwab’ewu nè bàna bàà—bàà mukàjì mupika kabèèna mwà kupyàna pàmwè nè bàna bàà mukàjì mudishikàmìne to, bwalu mbàà mu ngiikàdilù yibidi mishìilàngàne.

⁵⁹ Nènku, aci ncilelèlà, mwena bupidyà kèna mwà kupyàna pàmwè nè mwena kwitabuuja to. Kakwènakù mùshindù to, nànsha kakesè. Ke mwaba wùdi lutàtù leelù ewu ngwòwù awu. Kwèna mwà kufikisha nzòòlo wa cyena-màngumba ku diitabuuja pàmwè nè mukankù to. Kwèna ànu mwà kucyèenza to. Ke kùdi lutàtù lùlwila aku. Bikèngela wìtabuuje Díyì dyònsò dyà Nzambi. Nudi ànu . . . Kanwèna bapyànyi pàmwè to. Anyi nwènu kanwà—kanwàkudisanga naaci to; kanwènakù mwà kucyèenza to. Bikèngela wikalè mukankù anyi nzòòlo.

⁶⁰ Kàvwa mwà kwikala mupyànyi pàmwè nè Ishàmèèlà, dimiinu dyà mukàjì mupika to, wa . . . bwà mpatà. Sarah wàkeela Díyì dyà Nzambi mpatà, bwà nè Nzambi ùvwa mukùmbàne mwà kuDilama. Mònaayi Abraham! Nudi numòna cìndi ngiibakilapù aci bwà mu dyàlumingu mu dindà. Abraham kàakadyèlakù mpatà to. Sarah’s wàkacyèla mpatà; yèyè’s ke uvwa mwele mpatà. Kàvwa ng’Adàmà wakeela mpatà to; ùvwa ng’Evà wakeela mpatà. Pa nànkù, díbà adi, netùjandule byàbùngi pa bidì bitàngila bòbò abu patùdi tubyàngata mu dyàlumingu mu dindà.

⁶¹ Nànsha wa nyumà kèna mwà kwikala . . . wa mubidi kèna mwà kwikala mupyànyi pàmwè nè wa nyumà to. Kàbidi bàna bàà Ishàmèèlà kabèèna mwà kupyàna pàmwè nè—nè bàna bàà Izàkà to, nè ànu mùdi wa musunya kàyì mwà kupyàna pàmwè nè wa nyumà nànsha.

⁶² Èkèleeziyà wa mu mubidi; Èkèleeziyà wa nyumà. Kùdi èkèleeziyà wa mu mubidi udi bakàjì aba biikàle cifwànyikijilu; nè kùdi Èkèleeziyà wa nyumà, kàbidi. Pa nànkù, èkèleeziyà wa mubidi nè Èkèleeziyà wa nyumà kayèna mwà kupyàna pàmwè to. Yòyi mbikondo bibidi bitàpùlùke, bishiilàngàne; bisàmbà

bibìdi batàpùlùke, bishìilàngàne; mwínshì mwà bipungidi bibìdi bitàpùlùke, bishìilàngàne.

⁶³ Ke bwà cinyi Dyambwibwa ndishìilàngàne, nè nedìikalè ànu bwà Dimiinu dyà bukalenge dyà Abraham. Kadyèna mwà kulwila ku dimiinu dyà mubidi, dyà musunya dyà èkèleeziyà to. Nebikèngelè bwà kwikalaci Dimiinu dyà bukalenge dyà Dìyì dyà Nzambi, ku Abraham, Dimiinu dyà bukalenge. Ke bwà cinyi bìdi bikèngela bwà Dyambwibwa diikalèku dyàmbedi.

Bwalu, nwàvùlukaayi nè: “Twètù bàdi nè mwoyi nè bashààle katwàkupangisha, kupangisha aba bàdi balààle to. Bwalu mpungi wa Nzambi neàdìlè, bafwè mu Kilistò nebàbiikè dyàmbedi. Twètù bàdi nè mwoyi nè bashààle netwàngaciibwè muulu pàmwè naabò, cyàpàmwè, nè netùtwilanganè nè Mukalenge mu mpeepèlè.” Mònaayi, nè bàakafùnda kàbìdi nè: “Nè bafwè bakwàbò kabààkiikala nè mwoyi to, munda mwà bidimu cinunu.”

⁶⁴ Ki bwà cinyi, mwaba awu, kabààkwikala bapyànyi pàmwè to. Kabààkwikala mu Dyambwibwa pàmwè to. Kakùyì mpatà to kùdi èkèleeziyà wa mubidi, nè Èkèleeziyà wa nyumà; èkèleeziyà wa musunya, Èkèleeziyà wa nyumà. Dìbà adi, nwamònu’s, kakwènakù. . .

⁶⁵ Kakwèna Cilumbulwidi kùdi Dimiinu dyà bukalenge, dyà nyumà, didyànjlila kulongolola dyà Abraham to, bwalu mbalongolwela Mwoyi wà Cyendèlèlè. Mbiitàbe Mulàmbù mulongolola wà Nzambi; nè Mulàmbù awu, wùvwà Kilistò awu, Dìyì adi.

“Nènku ki bwà cinyi kakùcyèna mpindyewu dipiila to.” Yone Munsantu 5.24, panwikalà baswè Mufundu awu. “Ki bwà cinyi kakwèna mpindyewu dipiila bwà aba bàdi mu Kilistò Yèsù to,” Loomò 8.1, “bàdi kabàyi bènda bilondèshile mubidi to, kàdi bilondèshile Nyumà,” mu Loomò. 5.24: “Ewu udi *utèèleja* Dìyì Dyànyi,” mwàkù awu ùdi, “udi umvwa.” Mukwàciki wa maalà kanà yònsò ewu, cintu cikwàbò kanà cyònsò eci, ùdi mwà kuDitèèleja nè kukwàta njila kuya. “Kàdi ewu udi utèèleja Dìyì Dyànyi, ùdi umvwa Dìyì Dyànyi, nè wìtabuuja Ewu udi muNtùme, ùdi nè Mwoyi wà kashidi, nè kàakupìcila ku Cilumbulwidi to; kàdi wàmanyi kuumuka ku lufù muye ku Mwoyi.” Èyowà’s, mukalenge.

Yèyè udi bwalu busokoka bunène bwà Nzambi bumanyìishìlbwe ebu, uumvwa, mùvwà Nzambi munda mwà Kilistò Ùpungishangana nè bàà pa buloba, mùvwàYe nè Taatù biikàle Umwe, mùshindù wùvwà maalù masokoka manène à dikùmbàja dyà Nzambi wàngata nè ùDitwàla Yèyè mwinè, mumwènèshìlbwe mu cikondo cyà bantu, nè mudibù wà bantu, nè wènda wèndakana nè bantu; bwà kumwènesha Dìyì Dyèndè mu ditùkù, mu dijuuka dyà dìbà ku esètè, nè bwà kwenza cintu cimwècimwè aci ànu mùdi dìbà dikabwela ku

wesètè, bwà kuDìmwènesha mu Èkèleeziyà Mukàji-musèla, Dìyì dimwèneshiibwe. Nwamònu anyi? Neciikalè, bwà. . . “Ewu udi umvwa,” mbwena kwamba nè, “kumanya, cidi cimubulwila, cyà Ewu udi muNtùme, ùdi nè Mwoyi wà kashidi, nè kàakupicila ku Cilumbulwidi to; kàdi wàmanyi kuumuka ku lufù muyè ku Mwoyi.”

⁶⁶ Dimiinu dyà mubidi òvwa ànu cyambudi cyà dyà nyumà, Dimiinu adi. Ànu mùdì cìkolakola, mwepu, nè cizubu amu. Tudi baakùle pa byòbì abi kumpàlà, mu Dìyiisha dikwàbò, kàdi ndi muswè kwanji kucyambululakù ndambù, mu cyòci, anyi kwalukilakù cyàkàbìdì ku cyòci aci bwà katanci kakesè cyanààna.

⁶⁷ Mpindyewu kùdì bitùpà bisàtù byà dimiinu, bitùleeja cimfwànyì cilelèlè, bitùpà bisàtù byà dimiinu dyà mubidi mu buloba. Ànu mùdì dimiinu dikùnnyiibwe, dìpàtula cìkolakola, tubèji tukesè tùpàtukakù; pashiishe mwepu, pashiishe bungungu bwà bilòngò bulembèlèlepù; nè pashiishe cizubu; nè pashiishe dimiinu kàbìdì.

⁶⁸ Tàngilàayi bitùpà byà lusùmwinù lupwàngàne elu kaaba aka, nè mùdìcì cìkwàta mudimu ànu menemene mu cìfwànyikijilu, bwalu Nzambì ngudi Mfùkyamukèlè wa bufùki bwònsò. Ki bwà cinyì bufùki kabwèna mwà kupangilakù to ànu mùdì Nzambì kàyi mwà kupangila, bwalu n'Yèyè Wàkatèka cintu mu ngiikàdìlù waci bwà—bwà twètù kutàngilakù nè kumòna.

⁶⁹ Monaayi Hagàà, cìkolakola, cìvwa ciikàle mbangilu wa kumpàlà wa Dimiinu òvwa munkaci mwà kutòloka. Mpindyewu, kacìvwa cìmwèka bu Dimiinu to. Cìvwa ncìkolakola, bwalu yèyè ùvwa mukàji mupika, kàvwa mu mulayi to nànsa kakesè; kàvwa nè bwalu nè Dìyì to, ùvwa ànu cyambudi cyà Dimiinu.

⁷⁰ Mònaayi Sarah, mwepu wùvwa nè bungungu bwà bilòngò awu, ditùnga dyà beena Yudà adi dyàkapàtukilà munda mwèndè. Kuumukila ku, kupàtuka mu Sarah, kulela Izàkà; kupicila ku Izàkà, kulela Yakòbò; Yakòbò kulela bankambwà; nè ku bankambwà, kupàtulabò ditùnga.

⁷¹ Màriyà, diitabuuja dyà virgò adi, wàkapàtula Dimiinu Dìyì dilelèlè, dyà nyumà òvwiibwe mubidi. Nwamònu anyi?

Bakàji bàsàtù, bakàji bàsàtù bàvwa Dimiinu adi dipicilemù. Umwe wa kùdìbo mu bushùwà bwà bwalu cìvwa bungèndàmàsàndì, ku dibàkà dyà bakàji bààbùngì; mwibìdì ùvwa mukàji mudìshikàmìne; nè mwisàtù awu kàvwa nè disangila dyà mulùme nè mukàji to nànsa kakesè, kàdi ku diitabuuja wàkiitabuuja Dìyì dyà Nzambì. Hagàà, Sarah, nè Sarah nè Hagàà bònsò bàbìdì, bàvwa ku disangila dyà mulùme nè mukàji; kàdi Màriyà ùvwa virgò, ku bukolè bwà Dìyì dilaya dyà Nzambì. Ncyà bushùwà.

⁷² Cicolakola, Hagàà (bakàji bàbìdì), bààkeela mulayi mpatà, kàdi tàngilàayi nùmonè cyàkapàtulàci. Cikondo cívwa Hagàà, mukàji mwibìdì wa Abraham, uvwa kakùyì mpatà to ànu mukàji wa nsàkìdìlù, kàdi yêyè wàkalela muntu mulùme. Kàdi ùvwa muntu wa mùshindù kaayi mwinè awu? Bible mmwambè nè yêyè ùvwa “muntu wa cisuku.” Ùvwa ùdiila ku butà bwèndè bwà ntafu, nè muntu nànsa umwe kàvwa mwà kumucimuna to. Kàvwa wa bàtekesha, kàvwa mukùdimùne mucimà to, kàvwa mufùkùlùdiibwe to. Yêyè kàvwa mwà kutekeshiibwa to. Ùvwa muntu wa cisuku, bwalu ùvwa wa ku dibèngàngàne nè Dìyi dyà Nzambì.

Nè cintu kanà cyònsò cìdì cibèngangana eci; muyiishi kanà yònsò ewu, cidimba kanà cyònsò, èkèleeziyà kanà yònsò ewu, cìdì cibèngangana nè Dìyi dyà Nzambì; neàlèlè musumbà mutombòke, mwendi wà masandi wà cikwapànu wa Hollywood, nè kawùyì mwà kushààla nè Dìyi didì kadiyi disambakaja to, bwalu kawèna nànsa mubadila mu mulayi to. To.

⁷³ Sarah, mukàji mulelèlè wa mulayi awu, mwikàle mwepu, kulelayè muntu wa kalolo. Awu pèndè, wàkapàtula ditunga dilaya dyàkakwàcìlà Nzambì mudimu. [Katùpà kàà mukàbà wà mèyi munda mutupù—Muf.]

Kàdi, Màriyà, kakùyì disangila dyà mulùme nè mukàji to nànsa kakesè, kàdi wàkiitabuuja Dìyi dilaya; pèndè mwikàle virgò, kàyi mumanyè mulùme nànsa umwe to. Ke Mwanjèlò wa Mukalenge kutuutakeena nendè, kwamba nè: “Mwoyo, Màriyà, udi mubènèshiibwe munkaci mwà bakàji, bwalu Nzambì ùdi neebè.”

⁷⁴ Ke yêyè nè: “Bintu ebi nebiikalè bìshi?” Yêyè... Mmwàkambà mukàji awu.

⁷⁵ Mwanjèlò wàkamba nè: “Nyumà Mwímpè neàkubwikìdijè nè mundìdimbì.”

⁷⁶ Kacya kacitukù cyànji kwenjiibwa mu bikondo byònsò to, kàdi Màriyà wàkiitabuuja Nzambì. Ke yêyè nè: “Mòna musadidi mukàji wa Mukalenge.” Yêyè wakiitabuuja Dìyi.

Mmuni mwàmupetàye? Ùvwa mumanyè nè Hagàà wàkapeta mwànà awu ku dijinga dyà disangila dyà mulùme nè mukàji, nè Abraham; nè Sarah wàkapeta mwànà awu ku dijinga dyà disangila dyà mulùmè nè mukàji, nè Abraham, bàna bàà mulayi; mukàji mupika nè mukàji mudishikàmìne. Kàdi's ke yêyè ewu mulòmbiibwe bwà kwitabuuja. Aci cívwa dyandamuna ku diitabuuja divwà naadi Abraham, wàkiitabuuja bivwà kabìyi mwà kwenzeka awu, “Pàcibi ànu nè Nzambì mmwambè nè bìdì nànkù, aci cidi cyènza nè ciikalè cilelèlè.”

⁷⁷ Yêyè wàkiitabuuja Nzambì, kààkeelakù mpatà to. Wàkamba nè: “Musadidi mukàji wa Mukalenge nyêyè ewu. Didyudiibwa dindì mwambùle kùdì bàà pa buloba nànsa diikàle bìshi,

bìngenzèkèlè bu mùdì Dìyì Dyèbè.” È kulwakù Dimiinu dishùwashùwâlè.

⁷⁸ Sarah kàvwa mwà kucyèenza to, bwalu cìvwa ndisangila dyà mulùme nè mukàjì. Ncyà bushùwà. Nè nànsha Sarah kàvwa mwà kucyèenza to, bwalu cìvwa ndisangila dyà mulùme nè mukàjì.

Nànsha èkèleeziyà kènà mwà kucyèenza, ku dikòsoloka dyà tusumbu to! Bìdi bikèngela diitabuuja dyà kùdì virgò mu Dìyì dyà Nzambì bwà kwenza mulayi, bwà kulela bânà. Dikòsoloka dyà tusumbù kadyàdyàkutwàlakù Èkèleeziyà mulediibwe cyàkàbìdì to. Kadyèna mwà kucyèenzakù to. Nedikwamè cintu kampàndà cyà mupinganyi. Nedipatulè cikwàbò, cintu kampàndà cìdì cìDitentula, cintu kampàndà cìdì citeeta kwikala bu Dyòdì.

Kàdi Èkèleeziyà mushùwashùwâlè, mulediibwe cyàkàbìdì wa Nzambì ùdì wìtabuuja Dìyì dyà Nzambì kumpàlà kwà ní ncinyì cyònsò, nànsha ciikàle cinyì, bwalu Kadyèna dinyakaja to. Nku mulayi wà Nzambì kùdì bintu ebi bìlwila.

⁷⁹ Màriyà, wa cyà bushùwà awu, wàkamba, ku...kakùyi ku disangila dyà mulùme nè mukàjì, kwamba nè: “Bìngenzèkèlè bilondèshile Dìyì Dyèbè. Mònaaku musadidi Webè mukàjì!”

Ke kulelayè. Ncinyì cyàkalelayè? Kí mmuntu wa cisuku to; kí nditùngà to. Kàdi yèyè wàkalela Dìyì, Nzambì Yèyè mwinè mumwènèshìibwe mu mubidi; amen, Dimiinu dilelèlè dyà Nzambì dyàkamwènesha mulayi wònsò wàkafilà Nzambì mu Bible awu; kabùyì Bwèndè to, muntu nànsha umwe kèna mwà kwikala nè mwoyi kàbùyì Bwèndè to.

⁸⁰ Yèyè ùvwa dimiinu dilelèlè, yèyè ùvwa dyàmwàmwa dyà mwe-...yèyè ùvwa cizubu cyàkapàtula Lutete. Mpindyewu, bakwàbò bàbìdì abu bàvwa byambudi byà Mwoyi, ànu bu dimiinu dyà mubidi. Màriyà...Mpindyewu, vùlukàayi nè, ngàmbi nè bakwàbò bàbìdì abu...Mpindyewu, Màriyà, kanùmuvwiji Nzambì to, bu mùdì bàmwè bantu bàteeta bwà kumuvwija amu. Yèyè kàvwa nzambì to. To, mukalenge. Yèyè ùvwa ànu cyambudi cyà Dimiinu, ànu mùvwà bakwàbò abu amu; kàdi, bu mùdì diitabuuja mu Dìyì, didi ditàmba kutwàla cimfwànyi cilelèlè.

⁸¹ Ànu mùdì lutete lùboba, anyì blé amu. Didi dipàtula, cikolakola; pashìishe didi dipàtula, bungungu bwà bilòngò; pashìishe didi dipàtula, cizubu. Kàdi paùdì wela meeji nè, cizubu aci, wèwè kùyì mutàngile bìmpè to, necifwànàngane ànu menemene nè blé mulelèlè awu. Kàdi pàdici cikànguka, blé mulelèlè ùdì munda amu. Cyôcì cìdì ànu cyambudi cyanààna, cyàkàbìdì.

⁸² Pa nànkù, nudi numòna's, Màriyà, kí nku disangila dyà mulùme nè mukàjì to, kàdi ku diitabuuja; cintu kampàndà

cifwànnàngàne ànu menemene naaDì. Màriyà kàvwa Dimiinu adi to. Màriyà ùvwa cyambudi cyà Dimiinu adi.

Yèyè ki uvwa Dimiinu dilelèlè, dyà diitabuuja, bwalu Dîyì dyà Nzambi didi ku diitabuuja diwàYe mupèeshe Abraham. Nènku ànu diitabuuja ke didi mwà kupàtula civwà Nzambi mwambè nè Yèyè neènzè aci; diitabuuja mu Dîyì Dyèndè.

⁸³ Tàngilàayi mùdici citàmbe kufwànnangana nè Cintu cilelèlè, ke mùvwà Màriyà, kàdi bu cizubu. Cizubu ncijìngile dimiinu munda mwàci nè cìdikùba, nè cìdidiisha too nè pàdidi diimana pàà nkààyaadì, dibobè. Ke mùdì cikondo ciisàtù cyà èkèleeziyà eci (cyà Mpenta) cibobè, cikwàte Lutete elu too nè mu cikondo cyà kukàngula cizubu. Màriyà, mwikàle mamwèndè wa Kilistò, ànu cyamù cyà ditooyishila cyanàànà.

Yèyè kàvwa mashi à Màriyà to; Kàvwa mashi à mwena Yudà to; Kàvwa mashi à bàà Bisàmbà byà bendè to. Ùvwa Mashi à Nzambi. Nzambi ngwakafùka Mashi aa. Kacìvwa mwà kwikala disangila dyà mulùme nè mukàji to. Yèyè kàvwa mwena Yudà anyì wa bàà Bisàmbà byà bendè to.

⁸⁴ Mwànà wa mu dibòkò kàtu nànsa katobà kàà mashi à maamù to. Mashi àtu àfùmina kùdì taatù. Tudi bamanyè nè kabùlù kàà mashi kàdi munda mwà mulùme.

Bu mùdì nzòlòlò, ùdi mwà kwela diyi, cikuka cìdi mwà kwela diyi; kàdi piikalàci kacìyi cikwàta kùdì nyuunyi mulùme to, citààlà aci, diyi adi kadyàkutooyika to. Kadyèna nè bufukà to, nànsa mùdidi dimwèka menemene bu diyi didi nè bufukà. Ngikàdilù wadì yònsò ùdi ùmwèka wa mwomùmwè, kàdi kadyèna nè mwoyi munda mwàdi to.

⁸⁵ Mùshindù awu ngùdì bantu bàdi bàjikula Kilistò. Bààbùngì bàà kùdìbò bàdi bàmwèka bu beena Kilistò, bàteeta kwenza maalu bu beena Kilistò; kàdi bìkèngela wikale nè Kilistò munda mwèbè amu, udi Dîyì dimwènèshìibwe awu, cyanàànà kacyàkubobeshakù mwena Kilistò mulelèlè udi witabuuja Bible nànsa. Neciikale misangu yònsò ànu cintu kampàndà cyà cyena-màngumba. Kacyèna mwà kwikala nè mwoyi to, bwalu kakwèna Mwoyi munda mwàci to, bwà kwikalaci nè mwoyi.

Diyi kadyèna mwà kutooyika to, didi dìbolela ànu mu diswa amu, piikalàyi kàvwa mupetàngàne nè—nè nyuunyi mulùme awu to.

⁸⁶ Ànu mùdì bidimba byà èkèleeziyà amu. Udi mwà kubàbèmbèleja nè kubàbìikila, kubàvwija balami nè bikwàbò byònsò, kàdi nebiikalè... nudi nè diswa dyùlè tèntè nè mayi mabolè piikalàbu kabàyi bakwàta kùdì Citààlà. Ncyà bushùwà.

⁸⁷ Cyambudi, cizubu, cìdi cìDìdìisha. Ncyà bushùwà. Dìbà adi Dyòdì, mbwena kwamba nè, Dimiinu Dyòdì diinè, bìkèngela dyùmukè mu cizubu, anyì cizubu cìdi nè cyà kuumuka ku

Dimiinu, bwà kubweja Dimiinu mu Bwikadi bwà Mwàna, bwà Dyàmòna mwà kuboba. Byònsò mu cifwànyikijilu, tudi tumòna.

⁸⁸ Mònaayi mwab'ewu mpindyewu mùdiye mufwànàngàne, èkèleeziyà wa matùkù à ndekeelu aa, ùfika ku diikala mufwànàngàne nè Dimiinu Dyòdi diinè. Tàngilàayi mùdi dingumba dyà Mpenta didi dijuudiiibwe mu matùkù à ndekeelu edi, nènku netùdyūmwijè pashìishe ndambù, nwamònu's, mùshindù wùdibo bàfika ku ditàmba kufwànangana menemene mu mmwènekulu wa mufwànàngàne ànu nè Dimiinu.

Pàdi cizubu cipàtuka mu lutete lwà blé... anyi mu kabèji kàà blé, paanyimà pàà bungungu bumanè kumata munda amu mu cipidi ciibidi, nè cipàtùle cipidi ciisàtù cidi ciikàle ci—ci—cizubu. Mùshindù mene ùdi cyòci aci... Wèwè kùyi mujooji wa ntèmà menemene to, kwàdyàkukùmbanakù bwà kwamba nè cidìmu aci kí ndutete lulelèlè lwà blé to. Pàdi lutete lukesè lwà kumpalà alu lùpàtuka, ndufwànàngàne nè lutete, kàdi paùdi usòmbela panshi ulùbuulula neùjandulè nè kamwèna lutete nànsha. Cidi ànu ncizubu pa cizubu, cyambudi cyà lutete. Mpindyewu, lutete lùdi lùpàtuka mu cyòci aci. Kàdi vùlukàayi nè, kakùcyèna cikwàbò cintu paanyimà pàà cizubu aci to.

Vùlukàayi nè, kakùcivwa kàbidi Dimiinu dilaya ku mukàji to, mwaba nànsha wùmwè, paanyimà pàà Màriyà. Nè kakùcyèna kàbidi màngumba malaya paanyimà pàà Mpenta to. Cidiku n'Dyambwibwa nè Mukàji-musèla bipàtùka kuntwaku, Dimiinu, Dìyi dimwènèshiiibwe cyàkàbidi.

⁸⁹ Mònaayi, mònaayi mùdibi bìmwèka bifwànàngàne. Maatàayi mmwambè, Maatàayi Munsantu 24.24, mmwambè, nè: “Nyumà yibidi ayi mu matùkù à ndekeelu,” nyumà wa èkèleeziyà wa bantu bàà mu èkèleeziyà, nè Nyumà Mukàji-musèla wa bantu bàà Mukàji-musèla, “yìvwa mwà kwikala mifwànàngàne menemene mu mùshindù wà mifwànyine kuseeswisha nè Basungula mene bu nè bìvwa mwà kwenzeka.” Ke mùshindù wùdibi bifwànàngàne ngwòwò awu.

⁹⁰ Tàngilàayi mùdibi bipicile mu cicolakola. Mpindyewu mònaayi nè, netwikalè mwà kufwànyikija cintu kampàndà kaaba aka.

Luther, mu cikondo cyà èkèleeziyà, bwà kupàtula Dimiinu Mukàji-musèla, ùvwa umweumwe awu mu Nyumà. Ànu kaalutete kakesè kàmwèpelè kàà Dimiinu, Luther wàkiimanyinapù, cìvwa ndibingishiibwa ku diitabuuja. Yèyè ùvwa cifwànyikijilu mene cyà Hagàà, cicolakola aci.

Mònaayi nè, Wesley ùvwa cifwànyikijilu cyà Sarah, cyà Filàdèlèfiyà aci, cikondo cyà dinanga cyàkapàtulà mwepu aci. Aci mmu cikondo cyà Wesley, kùvwa bampàndànjlà bààbùngi kutàmba cikondo kanà cyònsò citùvwà naaci, cikondo cinènè cyà bumpàndànjlà cyà dibà dyà John Wesley.

⁹¹ Kàdi Mpenta ùvwa ùleeja Màriyà. Màriyà, citùpà Cyèndè cyà ndekeelu aci, mpindyewu, yèyè kàvwa Dimiinu adi to. Kàdi, Mwoyi wà Dimiinu awu wùvwa munda mwèndè, kàdi kaWùvwa mwànji kuboba to. Ndi ndyùmvwa mutèndeleeedi wa dikèma. Ndi nè. . . Màriyà wàkapeta Dimiinu adi, Kadivwa dyànji kuboba to. Dicivwa ànukù, kàdi Kadivwa dibobè to.

Ke mudibi kàbidì bwà cikondo cyètù cyà beena Mpenta citùdimu nè mwoyi eci! Kùvwa nè cyà kulwa Diyì dyà—dyà Nzambì dyà munda, didi kadiyì dyà cyena dīgumba to, pambèlù pàà bipaapu byà cyena màngumba abi.

⁹² Luther wàkaya ku kazubuzubu nè mwàkù wèndè wà kumpàlà awu nè: “Mwakàne neikale nè mwoyi ku diitabuujà.” Wesley ùvwa nè mwàkù yibìdì, “dijidiibwa,” mudimu mwibìdì musungùlùke wà ngàsà. Mpenta ùvwa nè mwàkù mwisàtù wà nè: “dyalujulula dyà mapà.” Kàdi Dimiinu dyònsò mu kaabujimà didi nè cyà kupàtuka! Nudi numòna mwàkadyènzàbo dīgumba pa mwàkù wùmwèpelè, nè pa mukwàbò mwàkù, nè mwàkù mukwàbò anyì?

Kàdi bikèngela kwikalè Cintu kampàndà cidi kaciyì mwà kudyenza dīgumba to; nkaabujimà kàà Mwoyi wùdì munda amu, ùdì nè kuDìmwèneshila mu Mukàji-musèla. Kakwèna mwà kwikala kàbidì bikondo bikwàbò byà èkèleeziyà paanyimà pàà cyòci eci to. Tukàadi ku ndekeelu, bàna bèètù bàà balùme nè bàà bakàji. Ke twètù aba. Twáfiki. Twasàkidila kùdì Nzambì! Amen. Mpindyewu, tudi tumòna nè bintu ebi mbilelèlè ànu nè mwàbì mwònsò.

⁹³ Nànsha nànkù tudi tumòna, dībà adi nè, bu yèyè mwikàle mwepu, anyì. . . Wesley mwikàle mwepu; Mpenta dībà adi mwikàle cizubu, cidi ciikàle citùpà cidi cìlondà cyà dilwa dyà Lutete. Kàdi, mwanèètù wa balùme, mwanèètù wa bakàji, cìkolakola kì n’Lutete to, nànsha mwepu kì n’Lutete to, nànsha cizubu kì n’Lutete alu to; nànsha mùdibì nè, cikondo cyònsò lùdì lùkola, lùdì lùtamba kufwànangana nè Lutete.

⁹⁴ Cìkolakola kì ncifwànàngàne nè lutete nànsha. Dībà adi cidi cipàtuka ncinyi? Mwepu, kasusu kakesè; kàdi nkatàmbe kufwànangana nè lutete kutàmbe—kutàmbe mùdì kabèji amu. Ncinyi cidi cìlonda pashìishe? Cizubu; ncilamè lutete, cidi cidiisha lutete.

⁹⁵ Mpindyewu tàngilàayi paanyimà apa ku mulayi wàkenzelà Nzambì Abraham, wà “Dimiinu dyèbè,” mu ngaakwilù wa nyumà. Yònsò wa kutùdì mmumanyè aci. Ùvwa wàkula bwà Kìlistò, kì ng’Izàkà to; ku Dimiinu dyèndè dyà diitabuujà.

⁹⁶ Mònaayi nè, wa kumpàlà awu ùvwa nku mukàji mupika, kàvwa nè mmwènekèlu wa cintu kampàndà cifwànàngàne nè mulayi to. Kabyèna bikèngela bwà Nzambì àpingaje Diyì Dyèndè bwà muntu nànsha umwe to. Nzambì mmwambè mwikalàdì mwà kulwa, nè mùshindù awu ke wàlwàdì. Kàdi

Sarah, mwikàle muleeji wa mpàla wa Èkèleeziyà, cifwànyikijilu cyà Èkèleeziyà, kujandulayè mwaba awu nè . . . kwambayè nè: “Èè, ndi ngèla meeji nè eci ncintu cyà citàmba kukèmeshabe. Mémè ncyènà nànsha mwà kwitabuuja aci to, pa nànkunda ùkàngàte Hagàà ùmwàngàte bu mukàjèèbè.” Nwamònu’s, mwaba awu, cicolakola aci kacivwa cifwànàngàne nè mulayi to, nànsha kakesè.

Kàdi pàakaseemenà Sarah, mpindyewu, aci’s civwa cimwèka cimpè bikolè be. Civwa mu kaabujimà kààci cifwànàngàne nè mulayi kuntwaku, kàdi nànsha nànkù kàcivwa ànu mulayi mushùwashùwâlè to. Bwalu, Izàlèèlà, mu Izàkà, wàkapangila nè wàkavila Dimiinu dilelèlà pàakalwaDì. Àlèluuyàh! Kanùsaluku to, kanùnyeemi to, aci kacyakunwènzela bwalu bubi to. Bàakavila Dimiinu adi, kuMupoopela pa nkùrusè, nè kuMukùdika ku nkùrusè!

⁹⁷ Ànu mwàkamba Pòlò mwab’ewu nè: “Dimiinu dyà—dyà mukàji mu—mudishikàmìne, anyi, mukàji mupika awu kadivwa dikèngesha Dimiinu dyà mukàji mudishikàmìne anyi?”

Nènku ke mùdì kàbidì dimiinu dyà dingumba dikèngesha Lutete lushùwashùwâlè. Bìkèngela bìikalè misangu yònsò ànu mùshindù awu. Kabààkwikala bapyànyi pàmwè to. Kabèèna baswikàkàne pàmwè to. Kakùyì mpatà to mmilayi yìbidì mishìilàngàne, bikondo bibidì bishìilàngàne, bisàmbà bibidì bishìilàngàne, ànu menemene. Umwe m’Mukàji—musèla, nè mukwàbò ng’èkèleeziyà. Kakwèna difwànikija to, nànsha kakesè, kùdibo.

⁹⁸ Kàdi bóbò kabèèna ànu Dimiinu didì dilaya bwà kulwa adi to. Nànsha Sarah pèndè, kàvwa . . . Nè nànsha Hagàà to, anyi Sarah kàvwa nànkù to, anyi—anyi Màriyà to, kàvwa Dimiinu adi to.

Màriyà kàvwa Dimiinu adi to. Ùvwa cyambudi cyà Dimiinu adi, kàdi ùvwa mudìishe, mupàtùle munda mwèndè. Ànu mùdì cizubu amu, cipàtùle munda mwàci Dimiinu dilelèlà, kàdi cizubu kì n’Dimiinu to. Cìdi ànu . . . Cìdi pabwìpì menemene nè Dimiinu. Ncìjìngìle Dimiinu.

Paanyimà pààpa mu cicolakola, mwoyi mmutangàlake mu cicolakola mwonsò amu. Nènku pàdìbì bìfika ku bungungu, wùdì ùtàmba kukùngwila pàmwè. Kàdi pàkaadìbì bikafika ku cizubu, cìdi mwab’awu ànu mùdì dimiinu amu, nè cìcifwimba cifwànàngàne ànu nè dimiinu adi menemene.

Yesù mmutwàmbìle cìikalàku mu ditùkù dyà ndekeelu nè: “Nebìikale bitàmbe kufwànangana mu mùshindù wà bifwànyine kuseeswisha nè Basungula mene bu nè bìvwa mwà kwenzeka,” kàdi pashìishe Dimiinu didì dipàtùkilamù. Nènku cizubu, Mwoyi wùdì wùmuka mu cizubu. Nè cizubu ncyambudi, nè cyòci aci menemene ke civwà màngumba ètù, cyambudi; Luther,

Wesley, beena Mpenta. Nènkù mpindyewu dîbà dyākànyì bwà Dimiinu kupàtukadi. Mònaayi, mònaayi, ànu . . .

⁹⁹ Yèyè kàvwa Dimiinu adi to. Màriyà's. Ànu cizubu, mwepu, nè cikolakola, byambudi byà citùpà cyà Dìyì, kí n'Dìyì dyònsò to! Luther ùvwa nè dibingishiibwa; Wesley ùvwa nè dijidiibwa; beena Mpenta bàvwa nè dyalujulula dyà mapà. Kàdi pààkalwà Dìyì . . .

Mpindyewu, bôbò's mbafwànyine kupàtula cyôci aci, nè, dibingishiibwa nedisungilè muntu. Nudi nwitabuuja nànkù anyi? Cyà bushùwà, cívwa cyambudi cyà Dìyì, ànu mùshindù wùmwèwùmwè wùndi ngiitabuuja nè cikolakola cidi citùpà cyà blé awu. Cyà bushùwà, bidi nànkù, kàdi's ncyambudi. Kí m'Mwoyi awu to.

Pashiishe kulwakù dijidiibwa. Mbanganyì bàdi biitabuuja dijidiibwa? Wèwè witabuuja Bible, bikèngela wènzè nànkù. Bushùwà. Pa nànkù aci kaciyèna ànu . . . ncitàmbe kufwànangana ndambù kakesè; ayi's mmyákù mikwàbò yibidì.

Kàdi pashiishe kulwakù Mpenta, dyalujulula dyà mapà. Dyakula dyà mu myakulu, bàdi bàcibiikila nè ncileeji cyà mbangilu cyà Nyumà Mwímpè. Dyakula dyà mu myakulu, mwaba awu, bàdi babiikila aci nè ncileeji cyà mbangilu, cyàkapàtulà (cinyi aci?) cizubu, kàdi bôbò bààkadivwija dingingumba.

Kàdi paùdì ulwa kwamba nè: “Mémè nè Taatù Wanyì tudi Umwe,” nè bintu bikwàbò ebi, dîbà adi cizubu cidi cyùmuka ku Dyôdì. Kàdi Èkèleeziyà Mukàjì-musèla mulelèlè, mushùwàshùwàlè neàpatulè Dìyì dyà Nzambì mu kaabujimà, mu kaabujimà kààDì nè mu dikàndà Dyàdì, bwalu Yèyè ùdi umweumwe awu makèèlèlè, leelù, too nè kashidi.

Mònaayi nè, munda mwà Màriyà mùvwa Dimiinu.

¹⁰⁰ Kàdi pààkafidiibwà Dimiinu adi, Mmwambè nè: “Ndi mulwè bwà kwenza diswa dyà Ewu udi muNtùme. Mémè nè Taatù Wanyì tudi Umwe. Mémè ncìyì ngèenza byenzedi Byèndè to, kanùNgiitàbùùjì to.” Ke Dimiinu ndyôdì adi. “Nganyì wa kunùdì udikù mwà kuMpiisha bwà bupidyà? Cidi Bible mulayè nè Nèngènzè aci, Mémè ndi mucyènzè. Nzambì mmucikenkète munda Mwànyì,” mwàkambàYe. “Nganyì udi mwà kuNgambila mpindyewu?” Nwamònu anyi?

Kàdi, Dimiinu adi—adi mu Màriyà, cizubu, cívwa pabwîpì nè kwikala Cyôci aci, kàdi kacívwa nànkù to. Dìcívwa ànu munda mwà difù amu.

¹⁰¹ Mònaayi, nè mu cikondo cyà beena Mpenta, mu cikondo cyà ba-Luthériens, mu cikondo cyà ba-Wesléyens, cívwa ànu cintu cìmwècìmwè aci mu cikondo cyà beena Mpenta eci.

Mpindyewu mònaayi's. Kàdi ku dikàngula dyà Bitampì Mwandamutekète, Bwàkabuulwibwà 10, bikèngela bwà Dìyì

mu kaabujimà dilediibwè cyākàbìdì mu dimwènèshiiibwa, nè dishindikiibwa kùdì Nyumà wa Nzambi, mu dikàndà mu kaabujimà ànu mùvwàDi pàvwàYe pa buloba apa amu; dimwènèshiiibwe mu mùshindù wùmwèwùmwè awu, dyènza bintu bimwèbimwè byàkenzàDi pàvwàDi pa buloba apa adi. Amen! Ebèlù 13.8, mmwambè nè: “Yesù Kilistò ùdì umweumwe awu makèèlèlè, leelù, too nè kashidi.”

Mu Luukà Munsantu 17.30, Yesù wākamba nè: “Mu matùkù à ndekeelu, ànu mwàkadìbì mu matùkù à Sodomà, pìikalà Mwànà wa muntu munkaci mwà kudiibuululà cyākàbìdì, neciikalè cintu cìmwècìmwè aci.”

¹⁰² Buloba bùdì mu ngiikàdìlù wa Sodomà. Nè èkèleeziyà mmubwelè mu Sodomà, pàmwè nendè, bu Lotà nè mukàjèndè.

Kàdì ndi ngàmba nè kùdì Èkèleeziyà Musungula mwaba kampàndà pa buloba ebu, udi munkaci mwà kudikòka nè kutèekiibwa pambèlu pàa bintu abi, nè dimwèneshiiibwa dyà Nzambi ndikòke ntèmà Yèndè. Tudi ku matùkù à ndekeelu.

¹⁰³ Cizubu ncipàtùlè bukolè bwàcì cibupèèshe Dimiinu, ncipàtùke; cìvwa cizubu cìmpè, kàdì cyākakwàta mudimu mu cyàcì cikondo. Nwamònu’s, m’Mukàjì-musèla Dîyì wa Mubàki Dîyì!

¹⁰⁴ Dimiinu dyà mu mubidi dyà Abraham, dyà Izàkà, nè Yakòbò, nè. . . Anyì, dimiinu dyà mu mubidi’s wè, èyowà, dyà Ishàmàèlà, dimiinu dyà mu mubidi dyà Izàkà, nè bikwàbò, bìvwa bikèngela bwà kubweladì mu buloba, bwà—bwà kupàtula dikwàbò edì, kupàtula Yesù.

Nènku ke mùdì makwàbò ònsò aa, mamiinu àdì nè cyà kuuma. . . Ndi muswè kwamba nè, bizubu bìdì nè cyà kuuma, nè bungungu bùdì nè cyà kuuma, nè bikwàbò byònsò bìfwà, bwà Dimiinu dyàmòna mwà kuDipàtula Dyòdì diinè. Ke mùshindù awu wùdìbì mu cikondo cyònsò.

¹⁰⁵ Màngumba mmambudi à citùpà cyàDi, citùpà cìdì Dîyì aci, bwalu nCisokoka kùdì balongolodì bàà meeji abu, anyì kùdì. . . mbacikàngila kule naabò, too nè pààmwènekà cikondo cyà Mikankù. Bible ngudi mwambè nànkù. Èyowà’s, mukalenge. Bwalu, mbatùlayè aci mu Maalàkì 4, menemene, ke mùdìbì.

“Yèyè mmucisokòke ku mèsù kwà beena meeji nè batàlame.”

¹⁰⁶ Ànu bu mutùdì bayiile Mukàndà wà Bwàkabuulwibwà, tudì tujandula nè yònsò, bònsò bàsàtù bàà ku baamisanjeelà bàà nyama yàkapàtukà ayi; yònsò wa kùdìbo wàkakùmbanangana nè Luther ànu menemene, yònsò wa kùdìbo wàkakùmbanangana nè mukwàbò awu ànu menemene, udi ngombe nè nyama mishiilàngàne yà mu Bible; bààkapàtuka too nè mu dibingishiibwa, dijidiibwa, too nè mu beena Mpenta. Kàdì mwinàyi wùvwa mukankù, ncyà bushùwà, nè mu cikondo aci Nzambi wàkamubàndisha. Pa nànkù bikèngela cìpìcìlè mu

cikondo aci bwà kwikalaci cijaalàme, èyowà's, mukalenge, mulayi wà mukankù mwikàle mûle tètè wà—wà Maalàki 4.

¹⁰⁷ Yesù kàvwa wa Màriyà to, kàdi wàkalwila kùdi Màriyà, bu mùdi Mwoyi munda mwà cizubu.

¹⁰⁸ Mpindyewu, bààbûngi bàà kunùdi nwênù bàna bèètù beena Kàtòlikè bàà maalu malenga aba, anyi bàà bakàji, dilòlò edi, pàmwàpa ùdi wèla meeji nè Màriyà ùvwa “mamwëndè wa Nzambi,” bu munùdi nwamba nè ke mùvwàye. Mmunyi mùvwàye mwà kwikala maamù wa Nzambi, pèndè Nzambi kàvwa nè ntàdijilu nè ndekeelu? Hmm? Taatù wa Nzambi ùvwa nganyi, díbà adi, pìikalàbi nè yéyè ùvwa maamù? Nwamònu anyi?

Yéyè ùvwa Mufùki wa mukàji, nè mukàji kàvwa mufùki Wendè to. Wàkafùka, Yéyè mwinè, mu difù dyà Màriyà, kí mbufùki bwà mukàji yéyè mwinè to. Ùvwa n'Yéyè, wàkafùka, Yéyè mwinè. Kàvwa wa mukàji to, kàdi mukàji ùvwa wa kùdiYe. Ncyà bushùwà. Bible ùdi ùtùlongesha, nè: “Bintu byònsò bìvwa byenza kùdiYe,” nwamònu's, “nè kakùvwa cintu nànsa cìmwè cìvwà cyenjìbwe kaciyi cyenjìbwe kùdiYe to.” Pa nànkù mmunyi mùvwàYe mwà... Mmunyi mùvwàYe mufwànyine kwikala nè maamù, Pèndè mwikàle Nzambi Yéyè mwinè?

¹⁰⁹ Mpindyewu tudi tumòna apa dibuulula dilelèlè dyà cìfwànyikijilu cilelèlè. Kùdi bakàji bàsàtù bambudi bàà dimiinu dyà mubidi, too nè pàakabobelàdi mu Yesù. Mmunyi mùvwà Ishàmàèlè kàyi mwà kwikala dyòdi dimiinu adi, bwalu ùvwa mulediibwe, mu bulelèlè, mu citùdi mwà kwela meeji leelù ewu nè, pambèlu pàà micipù yà dibàkà, bwalu yéyè ùvwa mwànà wa balùme wa mukàji mupika. Pashìishe kulwakù ndambù mufwànàngàne Nendè, bu Yesù, wapakàtuka mu Izàkà awu; kàdi kabìvwa ànu nànkù to, bwalu wàkalediibwa ku disangila dyà mulùme nè mukàji pankaci pàà Sarah nè Abraham. Kàdi pashìishe kulwakù Màriyà, ku dilediibwa dyà kùdi virgò, kulelayè Yesù Kilistò. Ncyà bushùwà. Nzambi, Dìyi, divwijìbwe mubidi.

¹¹⁰ Mpindyewu tàngilàayi. Kùvwa bakàji bàsàtù. Kùdi bakàji bàsàtù bafwànyikijìbwe mwaba ewu, nè maèkèleeziyà. Bakàji bàtu misangu yònsò ànu cìfwànyikijilu cyà maèkèleeziyà. Mbwenà kwamba nè, bikondo bìsàtù byà cyena-màngumba, byambudi, bìdi kàbìdi nè cyà kufwà nè kuuma, ànu mùdi cizubu nè bikwàbò nè cyà kufwà amu, bwà kushìila Dimiinu mwaba amu. Dimiinu kadyèna mwà kwikala mu dyòdi to, kadyèna mwà kuboba, èyowà's wè, pàdi cizubu, cikolakola, nè mabèji, byònsò mwà kufùbidila. Ncyà bushùwà. Cidi cipàtula katùpà nè katùpà kònsò kàà Mwoyi, ùvwa munda mwàbì, ùpàtuka; amen; cyònsò cìvwàci aci, ncyòci aci, kusàkidilakù.

¹¹¹ Kwêna mwà kucyènzakù to! Mpindyewu ncikondo cyà Dimiinu, anyi cikondo cyà Mukàji-musèlâ. Bizubu abi bikaadi bifwè. Bizubu abi bikaadi bimanè kuuma. Cikondo cyà virgò Dìyì, kàyi mulengiibwe to, ùdi virgo, nwàvùlukaayi, cikondo cyà virgò Dìyì. Bu nwènù mwà kuDitèèka mu byanza byà dīgumba kampàndâ, kaDyàkwikala bushùwà menemene virgò to; neDìikalè dyambula nè byanza byà bantu, kumpalâ kwà nwènù kufika kùdiDi. Kàdi Èkèleeziyâ wa Nzambì kí mmulengiibwe kùdi dīgumba to. Àlèluuyâh! N'Diyi dyà Nzambì dilediibwe kùdi virgò dimwènèshiiibwe, Yesù Kilistò umweumwe awu makèèlèlâ, leelù, too nè kashidi. Àlèluuyâh! Mùshindù—mùshindù mwinè wùdibi bilenga's wè! Ndi muDinangè. Ndi nDitatabuuja. Ndi mumanyè nè Didi Bulelèlâ. Kacyàkulengiibwakù to. Kakwàkwikala dyambula nè byanza dyà cyena-màngumba mu Dilediibwa dyà kùdi virgò dyà Mukàji-musèla nànsha. To, mukalenge! Yèyè ùdi—Yèyè mmutùmina dīyì kùdi Nzambì bwà kupátuka mu byà nànkù abi. “Kanùlengi bintu byàbò bikooyike abi to, mbilwè nkùmbikùmbi.”

¹¹² Cidi ànu cìmvùlwija. Pàmvwà mfùmina ku Phoenix ditùkù adi, ndwa ku Tucson, mfùmina ku masangisha, Nyumà wa Nzambì kukòka ntèmà yànyì ku cintu kampàndâ; patùvwà twenda tuya mukàjàànyì nè mèmè, twenda tuyiikila, nè bàna bàvwa balààle tulù paanyimà pàà kàshinyi apu, dībâ dīkaavwa dyènda dipita. Kukòkayè ntèmà yànyì ku kabemba kampàndâ, nè mèmè kutàngila kabemba aku ndambù è kukàlonga. Yèyè's ncifwànyikijilu cyà èkèleeziyâ leelù ewu.

¹¹³ Mpindyewu, kabemba aku, bu mutùdì bônso bamanyè, nkajīmije dimanyishiibwa dyàkù dyà bufùki bwàkù bwà ku cibangidilu. Aci ncyà bushùwà menemene. Musangu kampàndâ kàvwa kafwànàngane nè mukankù, tùùtwàkù; ki mùvwà kabemba. Kàdi mpindyewu kakàcyèna kabùùka kàya mu maulu kàbìdì to, bwà kukèba manà àkù à mu dyulu to, kàdi nkashààle kamotòtòke. Kakàcyèna kàbìdì kabùùka mu maulu to. Kàdi kènda kàtùpika pa buloba, bu mùdì nkùmbikùmbì amu; kasòmbe pa dikunji dyà tèlèfonè; kènda kàtùpika eku nè eku, kènda kàkèbangana nè tùlulù tufwè. Kabemba kakàvwa kenjiibwe bwà kwenza nànkù to. To, kàvwa kenjiibwe bwà kwikalakù kafwànàngane nè mukankù.

Mpindyewu, aci cidi ànu bu mùdì èkèleeziyâ. Kàvwa kenjiibwe kafwànàngane nè mukankù. Bivwa bikèngela bwà kwangatakù kaaba mu myaba yà mu Dyulu. Kàdi, pamutù pàà cyôci aci, nkamotòtòke. Kakàcyèna kabùùka mu myaba myenyi kàbìdì to, mu maulu. To, mukalenge. Kàdi kèyemena mīshindù yàkù yà cyena-leelù, yà ditèèkiibwa, yà dilonga dyà tulaasà, nè tèolòjì, mu dīgumba kampàndâ dikwàtakaja kùdi bantu; kènda kàkèbangana nè mushiki wà tùlulù tufwè, tubolè ndambù, tùvwà naatù cintu cìkwàbò. Ncyà bushùwà.

Patùdì twakulangana apa ki kwenda kutùpikakù eku nè eku kwà buloba eku, nudi numòna's, ncyà bushùwà, kabemba's. Nwamònu's, ke cìdì cìcyàmba ncyôcì aci.

Mukankù kî mmushintùlùkekù nànsa kakesè to. Wùdi wùshààla ànu mukankù.

¹¹⁴ Kakèna kàya mu maulu to, kabemba kakàcyèna kàbìdì kàya mu maulu, bwà kukwàcilamù manàà àkù mabìshi to, kàdì kàkaadi keèyemena ànu cìdìku mwà kusangana cimanè kufwà aci. Kabemba kàdì nè lutàtu. . . badi bamba nè nkenzèjiiibwe bwà kupweka pa buloba. Kàdì tângilàayi kabemba kàà kale aku leelù ewu. Pwekàayi nè njila, nudi numòna nshinga yà tèlèfonè basòmbepù kùdì tubemba musumbà mujimà, bwà kumòna ní kàdìkù mwà kupeta cintu kampànda—cintu kampànda cishebeya, cintu kampànda cibolè. Nkafikè mu mùshindù wà nè kakèena nè mapwàpwà makumbàne bwà kubùuka to. Kàdì. . . Katanci aka anyì, nekiikalè pa buloba, menemene, kalamàte pa buloba bwalu nkalwè kamotòtòke. Kàkèena kàkwàta mudimu nè dikànda dyàkù to, kàbìdì, dìdì Nzambi mukàpèèshe adi.

¹¹⁵ Dimanyishiibwa dyèndè dyà pabwàdì divwa mbwà kubànda mu maulu nè kutàngila panshi mwínshi, kàdì mpindyewu kàdì kàfika panshi kàdì kakàyi nànsa mwà kutàngila muulu nànsa. Ùdì nè meeji èndè pa tùlulù tufwè, bwà kujandula cidiye mwà kupeta mu njila; nyama kampànda wa dyobò, opossum, anyì cintu kampànda cìdì muntu kampànda mmudyatè ku màshinyì. Yèyè kî mmukankù to, kàdì ùdì cintu bu wòwù awu.

Ànu mùdì èkèleeziyà mweyèmène byàkudyà byèndè bwà dilonga dyà tulaasà nè bikwàbò amu, nè byàkudyà bifwè bimane kufwà kùkaadi bidimu, kupicila ku Luther, nè Wesley, nè beena Mpenta, nè bimanè kupita, ke bìvwàku kadyè. Kàdì munkaci mwà kwenda kakèba twìtabàayi kampànda mukwàtakaja ku byanza byà bantu; pamutù pàà kubùuka kuya mu myaba yà mu Dyulu yà Diyì, mùdì: “Bintu byònsò mwà kwenzeka bwà aba bàdì biìtabuuja.”

¹¹⁶ Mmwangàte biibidilu byà kabangu-nyuunyi. Bintu bifwè abi byàkashàala bwà nkumbikumbi, byà pa buloba abi. Malonga à tulaasà nè bikwàbò byà mùshindù awu, byàkashàala bwà bàà pa buloba, kî mbwà Èkèleeziyà to. Kòkù nkatàmbe kumototoka mu mùshindù wà kakàciyi. . . Kakàcyèna kàbìdì kakàyàbàle to. Kakèena mwà kubwela mu myaba yà mu Dyulu mikàyàbàle to, mùdì: “Bintu byònsò mwà kwenzeka bwà aba bàdì biìtabuuja.”

Kàdì kàsòmbela paanyimà, kamba nè: “Èè, Docteur *Kampànda's* mmwambe cikampànda. . . Dingumba dyànyì kadyèna diCìitabuuja mùshindù awu to.” Kaa, wèwè kabemba kanyangakaja, kiikalè nè bwòwà bwà kudyèla mu milayi yà Nzambi!

Wèwè udi wamba nè: “Èè, matùkù à bishimà àkaadi mamanè kupita.”

123 Mêmè nè: “Pashìishe, mwakudi awu, Mùpostòlò Peetèlò, ngwákamba mēyì aa.”

Nè vùlukàayi nè, Yesù wákamba nè: “Ewu yònsò wadìdìnga kuumushila Díyì òmwè ku Cyòci eci, anyì wasàkidilaKù díyì òmwè awu, cyèndè citùpà necyùmushiibwè ku Mukàndà wà Mwoyi,” awu’s mmuyiishi anyì muntu kampàndà udi nè dìnà dyèndè mu Mukàndà awu.

Mêmè nè: “Peetèlò wákamba nè: ‘Nyingàlàaayi, yònsò wa kunùdi, nè nùbatiijiibwè mu Dìnà dyà Yesù Kilistò bwà dilekelediibwa dyà mpèkaatù, nènku nenùpetè kupà kwà Nyumà Mwimpè. Bwalu mulayi wùdi kunùdi nwènu, nè kùdi bàna bèènu balela, nè kùdi aba bàdi kule, mu bùngi bwònsò bwàbiikilábo kùdi Mukalenge Nzambì wetù abu.’ Aci cyàkajika díbà kaayi? Cìtu misangu yònsò ànukù.”

Mmusùmbà wà tubemba tùdi tukùdimùke tushààle tubangu-nyuuni, nè twènda tùseesa pa mubidi kampàndà mukwàbò mufwe, ùvwà cikondo cikwàbò cibàshipèèle. Cyà bushùwà. Kì mmanà mapyamàpyà à mu Maulu kàbìdi to. Kì mbaàswe to. Kabèèna . . . Kabèèna mwà kwenza disangisha dyà milòmbò to. Kì mmikankù to, ànu kwinè kwònsò aku; mimòtòke, kì mmikàyàbàle to; yìdi ànu yìseesa eku nè eku.

124 Ke mùdi kàbìdi dīgumba dyètù dyà cyena leelù edi, dishindikila pa tèlòlòjì kampàndà mukwatakaja kùdi bantu, bwà kuumusha Bintu byònsò ebi ku dyumvwija, nè bóbò mbiitábe cyòci aci. Kabààkwangata Díyì dyákambà nè: “Yesù Kilistò ùdi umweumwe awu makèèlèlè, leelù, too nè kashidi to.” Kabààkwangata Maalàki 4 to. Nè yèyè kàkwangata milayi mikwàbò yònsò yìdi mikùmbànyìne ditùkù edi eyi to, nè kwamba mùvwà cikondo cyà èkèleeziyà, mwákambà mupròfetà nè: “Nekwikalè Bukènkè ku ìbaamulòòlò,” kabèèna bàngata Eci to. Mbaswè kwenda kuseesa pa cintu kampàndà cìvwà bulongolodi bwà Mpenta bushipè, kùkaadi bidimu lukàmà, bàdya manà mamanè kubanga kubola. Ncyà bushùwà. Kì mmimpè to.

125 Mònaayi nè, èkèleeziyà ngwa musunya wa dikèmà, ùdi ùdya yèyè mwinè bintu bibolè byà pa buloba, bintu bifwè byà pa buloba, ànu mudi nkùmbikùmbi wènzà amu. Cidiidi cyà èkèleeziyà, kabèèna bàlekela Nyumà Mwimpè ùtuma muntu mu èkèleeziyà kampàndà to; bàdi nè cyà kwikala nè cidiidi nè kumòna nè dīgumba nedìmwakidile anyì to. Ncyà bushùwà. Bàdi bu bàà pa buloba. Bàdi bàvwàla bu bàà pa buloba. Bàdi bàmwèka bu bàà pa buloba. Bàdi bènzà maalu bu bàà pa buloba. N’nkùmbikùmbi, bu mùdi bàà pa buloba. Mbatulùmùke, bamòtòtòke, bàdi bàà cibàngà. Ke cyònsò cidiku ncyòci aci.

Nukààdikù bamòne mukankù ùdya cibàngà anyì? To, mukalenge. Kakwènakù didyà dyà cibàngà munda mwàwù to. Nànsha mwena Kilistò mushùwashùwàlè kènaku ùdya cibàngà to. Yèyè kì mmumòtòke to. Neàye wènda ùkèbangana

too nè pàdiye ùCipeta. Amen. Èyowà's, mukalenge. Neàpetè Munyìinyi wèndè awu. Mmuswè Manà mapyamàpyà. Yèyè neàpwekè kwìnshì aku nè kumbula too nè mwàCipetaye. Yèyè neàbuuke wènda ùtàmba kuya muulu. Kòkò kakùyi cintu mu cibandabanda eci to, neàtambè kutùmbuka muulu ndambù. Paùdi utàmba kutùmbuka kuya muulu, ke paùdi utàmba kumòna. Pa nànkù dībà dyākànyì bwà mikankù yà ditùkù edi kubangayi kubùuka muulu, kuumbula mu milayi yà Nzambi, kī nkwikadila nè mwoyi ku cyākudyà cyà nkùmbikùmbi cìvwà cishipiibwe kùkaadi bidimu to; pàtukàayimù.

¹²⁶ Cidiidi, disungulangana bwà kubweja nè disungulangana bwà kupàtula, bamba *cikampànda*, *cikansanga*, anyi *cikankènga*, nè Nyumà Mwimpè kàyi nè bukenji bwà kubwela buludi mu èkèleeziyà kutàmba ní ncinyi to. Kakùciyi kàbidi masangisha à milòmbò, kakùciyi kàbidi ditendekeena kùdi Nzambi bwà kukùmbaja Dìyi Dyèndè nànsha! Kabàyi kàbidi biitabuuja nè Dìyi dicidi ànu dimwèdimwè adi makèèlèlè, leelù, too nè kashidi to! Bàdi ànu bàdiwija bu nkùmbikùmbi, bapetè dingumba, bàfùndisha dīnà dyàbò mu mukànda; nè bashààle beena lulèngù nè bamòtòke, nè basòmbè paanyimà pàapa bàsànkila munyinyi kampànda wà mubolè. Nè, piinè apu, pèndè nè cyà kwikalaku nànsha kabemba kàdi kafwànànganè nè mwanaàbù mukankù, mupròfetà wàkatwàla Dìyi dilelèlè nè kuDìmwènesha awu.

¹²⁷ Mweyèmène pa tèòlòji mubolè ndambù, mwenza ku byanza byà bantu. Nkwepi kùdiye ùmupetela? Mu dibèji kampànda dyà ndongamu mukwàtakaja kùdi bantu wa kàlaasà kàa Dyàlumingu, divwà mulongeshi kampànda mushipe bwèndè kalè wàwa mu sèminère kampànda, kumwambila nè: “Matùkù à bishimà àkaadi mamanè kupita. Cintu pààci nè ndibàtiiza dyà Nyumà Mwimpè kacitukù to. Cyònsò Eci's ndukutukutu.” Udi uswa kungambila nè mukankù mmufwànyine kudyà aci anyi? Kawènakù mwà kucyèenza to. To, mukalenge.

¹²⁸ Nànsha mwena Kilistò kàadyākudyà bintu bibolè byà byùmukila ku malongesha à cyena dingumba à kale nè bikwàbò to. Mbaswè Dìyi dyà Nzambi, dibishi, mulayi wà dībà edi. Nzambi wàkalaya tùlulù mu matùkù à Luther. Yèyè wàkalaya bikwàbò bintu mu matùkù à bakwàbò. Kàdi mpindyewu Yèyè mmutùlaYè Cyākudyà cyà dinoonò, Cyākudyà cipàte cyà mālòngò mwandamutekète, bwalu Bitampi Mwandamutekète byònsò mbikàngùdiibwe, nè bintu byònsò mbilongolola bwà Dìyi dyà Nzambi, bwà aba bàdi mwà kwakidila! . . . ? . . .

¹²⁹ Tubemba tùdi tùtùpika bu tubangu-nyuunyi. Kaa, èkèlekèlè! Anjì elàayibi meeji ku bwalu abu, mùshindù mwinè wùdidi dyà bwalu kashondo's, mòna's—mòna's dībà ditùdi edi's. Ànu mùdi kabemba kajìmije dimanyishiiibwa dyākù kùkaadi ntàntà mule bu kabemba, ke mùdi kàbidi èkèleeziyà mujimije

kùkaadi ntàntà mule dimanyishiibwa dyèndè bu mushààdile (nyuunyi) mwanààbò nè mukankù, bapròfeta bàà Nzambi.

Musangu kampàndà cyambudi cyà díyì dilelèlè, dibingishiibwa; pashiishe, kulwa cyambudi cyà dijidiibwa; díbà adi, kulwayè cyambudi cyà dibàtiiza dyà Nyumà Mwîmpè, dyalujulula dyà mapà. Kàdi pashiishe, pàdiye ùtúngunuka nè kwalukila cyànyimà, ùdi ùteeta bwà kudyà cintu kampàndà, manà à ditùkù dikwàbò, mmabolè, kaèna mîmpè nànsa.

Mukankù mushùwashùwâlè wà ditùkù edi mmumanyè nè bìvwa ànu bîmpè. Kàdi twètù tudi nè aci, kusàkidilakù, too nè mùdi Yesù Kilistò mumwènèshiibwa mu kaabujimà kàà bukolè Bwèndè, mwàkalayàYe bwà kwikala mu ditùkù dyà ndekeelu edi amu.

¹³⁰ Ùdi mpindyewu cizubu cyume ncyoncyoncyo. Cikaadi cimanè kupita; Nyumà wa Nzambi wàkápícila munda mwèndè, aci's ncilelèlè. Nènku kààkwikala, yèyè kààkwikala mupyànyì pàmwè nè Dimiinu Díyì dishìndika to. Ncyà bushùwà nè kààkwikala nànkù to. Kààkwikala mu Dyambwibwa to. Yèyè neikalè cidimba cyà èkèleeziyà, ùdi mwà kulwa mu dibìikà dyà ku lufù diibìdì, kulumbulwishiibwayè bilondèshìle cidiye mutèèlèje.

Pawikalà kaaba aka dilòlò edi, nè mwikàle ànu cidimba cyà èkèleeziyà cyanàànà, cyèbè cilumbulwidi necikalè bishi, patùdi twètù bònsò nè cyà kwimana kuntwaku nè kujaadika nè wèwè uvwa múmvwè Bulelèlè? Nwamònu anyi?

Yèyè kènà ùbùuka kàbìdì mu dyulu, mu mwaba wùdi kawùyi mumanyike, mu citàmbe mfùkulu to, mùdi Makolè nè butùmbùke, nè milayi yà Díyì dyà Cyendèlèlèlè dyà Nzambi mivwijìibwe ya bàpeta, “bintu byònsò kùdi aba bàdi bìitabuuja.” Kààkwitabuuja Aci to, mwàkambayè, ùdi wàlukila buludi ku nshinga wa téléfonè, wamba nè: “Dingumba dyànyì didi dyàmba nè tùlulù tùdi ànu twîmpè.” Nànsa mùditu nè biinya munda mwàtù amu, kadi, nànsa nànkù nè: “Bìdi ànu bîmpè,” nwamònu's. Mbilondèshìle ku cyòci aci.

¹³¹ Mpenta ùdi ànu bu mwanààbò wa bakàjì nkùmbikùmbi wa cyena-màngumba awu, musòmbe mpindyewu mu “nkwasà myalàbàle yà cisangilu cyà babi,” cyà bushùwà, munkaci mwà kutèèleja mùdi balombodi bèndè bàà cidiidi, bàà maalu à buloba abu bàmudiisha nè cyàkudyà cyà nkùmbikùmbi cyà tùlulù tufwè, cyà cintu kampàndà cikaadi cipite, kùkaadi bidimu makùmi àtaanu. S'ke ngiikàdilù wa èkèleeziyà wa beena Mpenta nyèyè awu. Kaa, èkèlekèle!

¹³² Ànu mùvwà Sarah muteetè bwà kutwàla mulayi wà citàmbe-mfùkulu ku—ku Hagàà mùdisungwila awu, ke mùdi kàbìdì èkèleeziyà, ùteeta bwà kutwàla ditàbuluja. Batangadiki bèètù banène mu matùnga ònsò leelù ewu nè: “Ditàbuluja mu cikondo cyètù! Ditàbuluja mu cikondo cyètù! Nwènù ba-

Méthodistes bônso, ba-Baptistes, beena Mpenta, disangishaayi bônso pámwè.” Mmunyi munùdì mwà kupeta ditàbuluja dyà Manà mapyamàpyà pa cyàkudya cyà kale, cifwè, cyà nkumbikumbi? Mmunyi munùdì mwà kucipeta, ditàbuluja mu cikondo cyètù eci?

Ditàbuluja nediikalè ditàmbe bukesè mu mùshindù wà kabàyiku mwà kumanya nè ndyenzèke to.

¹³³ Beena Mpenta kwambabo nè: “Kaa, nekwikalè cintu cinène cyènzèkà.”

Cidi munkaci mwà kwenzeka, kàdi bôbò kî mbacimanyè to. Nwamònu’s, ke cyôci aci. Nwamònu anyi? Eyowà’s, mukalenge. “Bwalu mwaba wùdì Mubidi awu, ke wàdisangishilà mikankù,” ànu mùdibi bushùwà nè buloba bùdikù emu. Nwamònu anyi? Ke cidiYe mwambè. Mubidi ncinyi? Dìyì. Yèyè ùdì Dìyì, Mubidi, Kilistò! “Kilistò munda mwèbè,” umweumwe awu makèlèlèlè, leelù, too nè kashidi. Mùshindù mwinè wùdìCi cilelèlèlè’s wè!

¹³⁴ Sarah, ùteeta bwà kufikisha milayi yônso ku dyula, nudi numòna’s, mu munène... bu mùdì èkèleeziyà leelù ewu, “ditàbuluja dinène mu cikondo cyètù,” (ku cinyi?) ku mulayi munyangakaja. Mmunyi muwikalàku mwà kucyènza, pàdìbi nè Nzambi kacya kàtùku mwanji kubènesha bulongolodi?

Yèyè kacya kàtùkù mwanji kukwàta mudimu nè bulongolodi nànsha. Pàtù mukenji ùpàtuka, nè bàwènza bulongolodi, ùvwa ùfwila ànu mwaba awu. Ndi ngèlèla mulongì kanà yônso wa maalu-malonda kadyòmbò bwà àndeejèku mwaba wùkaadiwukù mubiishiiibwe ku lufù. Wàkafwà ànu mwaba awu mene nè kushààlawù ànu mwaba awu. Nzambi ùvwa ànu ùpàtukila buludì mu cyambudi aci, ùbwela mu cikwàbò; kupàtuka buludì mu ba-Luthériens, kubwela mu ba-Méthodistes; kupàtuka buludì mu ba-Méthodistes, kubwela mu beena Mpenta; mpindyewu mMpupàtùke buludì mu beena Mpenta, kubwela mu Dimiinu adi.

¹³⁵ Bwalu, bidi bìkèngela ciikalè Dimiinu. Kwèna mwà kutàmbe bufùki bukolè to. Kakwèna, cintu cikwàbò nànsha cìmwè mwaba awu cidi mwà kwenzeka to ànu Dimiinu, pa nànu Dimiinu adi nedidipatulè Dyôdi diinè. Yèyè ùdì umweumwe awu makèlèlèlè, leelù, too nè kashidi; Dikunji dyà Kapyà dimwèdimwè adi, dilleja bimanyinu bimwèbimwè abi, bukolè bùmwebùmwebè abu, Nzambi umweumwe awu, bishimà bimwèbimwè abi, cintu cìmwècìmwè aci, byàkashindika Dìyì nè Bible, ànu mu byôbi menemene. Yèyè ùdì umweumwe awu makèlèlèlè, leelù, too nè kashidi. Yèyè ngudi utùlombola, dilòòlò edi. Nzambi àtùkwàcishèku bwà kuCimòna nè kuCiitabuuja! Bushùwà’s!

¹³⁶ Nwamònu’s, Sarah, èkèleeziyà awu, Hagàà mudisungwila awu. Kabyàkakumbana to. Mmwómò anyi? To. Kasumbù kèndè kadisungwila aku kakàakukumbanaku leelù ewu to, kòkò

pààkù. Baadocteurs, nè beena Ph.D., nè beena L.L.D., kabèèna bàkumbana to. Byambudi byònsò bidi bipangila.

Luther wàkapangila, mwàkenzà Hagàà amu. Cyàkenzà Hagàà ncinyi? Hagàà wàkatèèka mwanèndè wa balùme mu cyâdi cyà mukàjì mukwàbò (ncyà bushùwà anyi?), bwà kukolesha mwanèndè. Hagàà wàkenza nàнку; wàkafila mwanèndè wa balùme, mwanèndè umwèpelè wa balùme, mu cyâdi cyà mukàjì mukwàbò (kàyi mamwèndè to), bwà kumukoleshayè. Ncintu cìmwècìmwè aci cyàkenzà Luther pààkapèèshàye mwanèndè wa balùme, dibingishiibwa, kumufila kùdi dinguimba kampàndà bwà kukùtakanangana naadi, aci ncyà bushùwà menemene, bwà kumukolesha.

¹³⁷ Wesley wàkapangila mùshindù wùmwèwùmwè wàkapangila Sarah awu, wèla mpatà nè Dilediibwa ditàmbe-mfùkilu didi dibàtiiza dyà Nyumà Mwîmpè, bu mwàkenzà Sarah ku mucì wà lusànga. Pààkaleejiibwà Wesley ku citàmbe-mfùkilu, pààkafikà cikondo cyà beena Mpenta nè kutwàdilabò Wesley dyakula dyà mu myakulu nè Cyònsò eci, kusekabò nè kuCyèlulwilabò. Nwènu bònsò Église de Christ, nè nwènu, bàdi bàdibìikila nàнку: nè nwènu ba-Baptistes, nè ba-Presbytériens, muntu nè muntu wa kunùdi, nwènu kwela dyùlù dyènu muulu, pa Cyôci aci, nè kuya kule naaCì. Cyà bushùwà. Cyùdi mwenze ncinyi, Wesley? S'ukàadi musùmbishe mwanèèbè ku bulongolodi kampàndà, nè kufwàye nè kubùtuka. Aci's ncyà bushùwà menemene.

¹³⁸ Kàdi, Dìyi, Dìyi dilelèlè dyàkatungunuka. Kadyàkashàala mu bulongolodi abu to. Dyàkatungunuka buludì nè kubwela mu mpenta, nè kwenda kukola. Ûvwa Mwànà mutàmbe kukola, ànu bu Dimiinu dyàkamatà mu matrice adi; nènku, paanyimà pàà katanci, Cyàkatwàdija mu mufubà wà mongo, pashìishe kupeta bisùlusulu, nè kupeta mutù nè makàsà.

Nènku, paanyimà pàà katanci, kufikaCì mu mùshindù wà nè Cyàkalediibwa. Ncyà bushùwà. Pa nàнку, mùshindù awu ke wùdi Èkèleeziyà mubobe, mùshindù wùmwèwùmwè awu.

¹³⁹ Wesley wàkeela mpatà ànu menemene mwàkeelà Sarah ku mucì amu. Wàkamba...Pàvwa Mwanjèlò wa Mukalenge, Muntu, muvwàle bu...Anyi, Mwanjèlò, Nzambi, mmwòmò's, Yèye mwinè. Elohim, muvwàle bilàmbà bu muntu, mwimàne mwaba awu nè lupwishi ku bilàmbà Byèndè, nè wàmba nè Ûvwa mufile mulayi; paanyimà pàà Sarah mumanè kwikala nè bidimu makùmi citèemà, nè Abraham nè bidimu lukàmà.

Ke Sarah kusekelayè mu dyâpà, kwambayè nè: “Mmunyi mùdi eci mwà kwikala, pàdi Abraham nè mèmè katùciyi nè, èè, katùciyi bu bansongà to, dipetangana dyà mu dîkù, pàmwâpa kùkaadi bidimu makùmi àbìdi.” Ûvwa wipacila ku bidimu lukàmà. Wàmba nè: “Mèmè ewu, mpeta masàuka nè mukalenge wanyi, mèmè mununu, nè yèye pèndè, mununu anyi? Nè musùlù wèndè wà mwoyi awu mmufwè, nè matrice àanyi

àkaadi mafubidile. Mabèèlè àànyì mmùmè; mijilu yà mabèèlè mifubidile. Mmunyì mündi mwà kumupeta?”

¹⁴⁰ Nzambì kwambaYè nè: “Mémè ngudi mucilayè. Yèyè ùlwalwa, nànsha bishi!”

¹⁴¹ Ki mwàkenzà Wesley pèndè. “Mmunyì mutùdiku mwà kwitaba byà dyakula dyà mu myakulu, nè dyondopa dyà kùdi Nzambì, nè bikwàbò abi. Kabyèna bwètù twètù mu ditùkù edi nànsha.”

¹⁴² Nzambì wàkamba nè: “Ndi mulayè nè: ‘Mu matùkù à ndekeelu Nèngìcikijè Nyumà Wanyì pa mubidi wònsò.’” Yèyè ngwàkalaya bwà kucyènzà, nè Wàkaya kumpàla nè kucyènzà, nànsha bishi. Nè èkèleeziyà wa ba-Wesléyens, nè bàna bààbò bàà bakàjì batekète bàà ku bungungu bwà bilòngò abu, bàà ba-Baptistes, ba-Presbytériens, nè beena Église de Christ, nè ba-Nazaréens, ba-Pèlerins de la Sainteté, nè Bàna bèètù Basanga, nè bakwàbò abu, bàakafwà pàmwè nendè. Ke Èkèleeziyà kutùngunukayè nè kuya.

Mpindyewu cyàkenzà Mpenta ncinyi? Bàdìvwija bulongolodi, ànu bu cizubu. Wàkenzà cintu cìmwècìmwè aci. Wàkadìvwija bulongolodi pàmwè, kudìtèeka yèyè mwine bu cizubu. Ncyà bushùwà.

¹⁴³ Mpenta ùvwa bu Màriyà. [Katùpà kàà mukàbà wà mèyì munda mutupù—Muf.]...difestò dyà mpenta, tàngilàayi cyàkenzà Màriyà. Ncinyi cyàkenzà Màriyà bibi? Ku difestò dyà beena mpenta, musangu kampàndà, wàkakùngamangana nè musùmbà wà bantu bàà myànzù mitùmbùke, baakwidi. Dìbà adi, Mwanèndè wa balùme, kàvwakù mwà kuMupeta mwaba nànsha wùmwè to. Ke kwalukilayè, lwendu lwà matùkù àsàtù.

Yèyè ùvwa muMushiye. Bu mùdi èkèleeziyà wa cyena leelù ewu, misangu mitwè ku yisàtù kuvudija ku yitaanu, anyi makùmi àbìdì nè yitaanu, yidi èkèleeziyà mushiye, kùkaadi bidimu bitwè ku makùmi àtaanu, anyi makùmi mwandamutekètè nè bitaanu.

¹⁴⁴ KuMushiya ku difestò dyà mpenta. Màriyà wàkaalukila pàmwè nè Yòzefù, matùkù àsàtù, wènda ùMukèba. Ùvwa munkaci mwà kuMukèba; kàyì mwà kuMupeta to.

WàkaMusangana. Cyàkasanganàyè cinyi? WàkaMusangana mu ntempèlù, ùyiikilangana pa Dìyì dyà Nzambì nè baakwidi. Nènku ànu kumpàla mene kwà baakwidi abu, bantu bàà luumù abu, Màriyà kulekelelayè ridô panshì. Wàkenzà ànu menemene cintu cìvwà kaciya cikèngela bwà yèyè kwikala mwènzè to.

Numubiikila nè: “Nzambì; maamù wa Nzambì”? Bìvwà bikèngela bwà maamù kwikalayè nè lungènyì lutàmbe lwà mwanèndè wa balùme.

Ke yèyè nè: “Tatwèbè nè mémè’s tudi baKukèbe nè binsonji, mundaamuunya nè bufuku.” Huh! “Tatwèbè nè mémè,” mwikàle wàmba nè dilediibwa adi kadìvwà ditàmbe-mfukilu to, nè

Yòzefù ùwva tatwëndè wa Yesù. Wàkavila dilediibwa dyà ditàmbe-mfùkilu adi.

Mpenta wàkangata dyakula dyà mu myakulu. Baakavila Dilediibwa dyà Dìyì. Ke cyàkenzàye menemene. Neàngatè bintu búngì kampànda byà ku Dyôdì, kàdi kààkwangata bikwàbò byà ku Dyôdì to. Wàkavila Dilediibwa dyà Dìyì, ànu mwàkenza Màriyà amu. Kàdi, tàngilàayi, kakwàkwikala kàbìdì malongolodi paanyimà pàà Cyôci eci to.

¹⁴⁵ Tàngilàayi Dìyì Dyôdì diinè, nànsa nànkù, bidimu dikùmi nè bibìdì, ànu kantu kakesè menemene mu cizubu amu, Yèyè nè: “Kwèna mumanyè nè Ndi nè cyà kwikala mudifile ku maalu à Taatù Wanyì anyi?” Dìyì dyàkalongolola èkèleeziyà, ànu mwaba awu mene.

¹⁴⁶ “Cyùdì wenzela bintu byònsò ebi ncinyi? Udi mumanyè nè kwèna mwà kwenza eci to. Netùkangè biibi byètù; katwàkukwitabilakù bwà wèwè kubwela to.”

¹⁴⁷ “Bwalu kwèna mumanyè nè Ndi nè cyà kwikala mudifile ku maalu à Taatù wanyì anyi?” Nwamònu anyi? Bushùwà, bushùwà, citàmbe-mfùkilu cilelèlà!

¹⁴⁸ Museeswishìibwe, kwambayè ànu nè Yèyè mmwànà wa Yòzefù, ànu muntu wetù ewu. Anyi, cyàkenzà Mpenta aci, bàvwa bàmba ànu mùvwàYe “umwe wa ku bàsàtù.” Yoyòyò! Ndi mumanyè nè aci cyénjì bibi ku mwoyi nè: “umwe wa ku bàsàtù.” Kàdi Yèyè ùwva bònsò bàsàtù abu, mu Umwe. Kàvwa umwe wa ku bàsàtù to. Kàdi beena Mpenta abu: “Kaa, èyowà’s, Yèyè’s m’Mwànà wa Taatù, wa Nyumà Mwímpè, pashìishe. . .” Kaa, èkèlekèle!

Kàdi Dìyì dyà cyà bushùwà, dilelèlà didi dyàkula patòòke, dyàmba nè: “Kabèenamù bàsàtù to. Bàdi umwe.” [Katùpà kàà mukàbà wà mèyi munda mutupù—Muf.] Amen. Kanwèna bamanyè Dìyì dyà Nzambì anyi? Kanùcìvwijì bàsàtù to; kàdi Umwe.

¹⁴⁹ Mònaayi nè, kakwàkwikala kàbìdì cyambudi, èkèleeziyà maamù, màngumba, paanyimà pàà cizubu cyambudi eci.

¹⁵⁰ Bwalu, paanyimà pàà cizubu, kakùcyena kàbìdì, cintu nànsa cimwè cìdì cishààle to ànu Lutete. Ncyà bushùwà anyi? Bikèngela ciikàle Lutete. Bikèngela lwikale lwà mùshindù wùmwèwùmwè wàkayà mu buloba alu, Yesù Kilistò umweumwe awu makèlèlèlè, leelù, too nè kashidi, Nyumà kulwa pa Mukàjì-musèla bwà kwenza bintu bìmwebimwè byàkenzàYe abi. Nwamònu anyi? Ndivulgana cyàkàbìdì dyà Lutete.

¹⁵¹ Dìyì, diciikàle ànu nsongà, dyàkaakula Dyôdì diinè nè: “Kàdi kwèna mumanyè nè Ndi nè cyà kwikala mudifile ku maalu à Taatù Wanyì anyi?” Huh!

¹⁵² Ke mùnsokòntù wà Mukenji ngwôwò awu mpindyewu, ànu menemene: “maalu à Taatù.” Maalu à Taatù ncinyi?

Nudikù mwà kudifwànyikijila cívwa maalu à Taatù, Bwèndè anyi? Bwà kuuja cyàkambà Yeshààyi nè: “Virgò neimite difù.” Kukùmbaja cyàkambà Yeshààyi, kàbìdi nè: “Mulèmà neàtupikè bu ngulungù,” nè bintu byònsò ebi bìvwa mwà kwenzeka. Bu mwàkambà Mòsà nè: “Mukalenge Nzambi webè neàjuule Mupròfètà, munkaci mwènù, mufwànàngàne naanyi.” Cívwa mbwalu bwà Taatù, bwà kuuja Dîyi adi.

Èè, aci cyôci cipicile mu bikolakola abi, byà bakàji bàà mu mubidi abu; kàdi bìshi bwà bikolakola byà bakàji bàà nyumà aba, èkèleeziyà eyi? Maèkèleeziyà mbwena kwamba nè bakàji, *bakàji* mbwena kwamba nè “maèkèleeziyà,” èyowà’s wè. Ncyà bushùwà anyi?

Dìbà adi ncinyi aci mpindyewu? “Tudi nè cyà kwikala badifile ku maalu à Taatù,” s’ki mùdi Blé mufwànyine kwela lubilà, Lutete alu’s. Èyowà’s, mukalenge. Cìdici nè cyà kwenza cinyi? Kushindika Maalàki 4, kushindika Luukà 17.30, kushindika Ebèlù 13.8, kushindika Yone Munsantu 14.12, kushindika Dîyi Dyèndè dyònsò. Kushindika Ebèlù, ndi muswè kwamba nè. . . Bwàkabuulwibwà, nshapità wa 10, bwà dikàngula dyà Bitampi Mwandamutekète, nè maalu masokoka à Nzambi; nànsha mene nè dimiinu dyà nyòka, nè byònsò, bìvwa mwà kumwèneshiibwa; dibàkà nè difwà dyà dibàkà nè maalu-masokoka makwàbò ónsò aa àvwa masokoka mwínshi mwà makunji munda mwà bidimu byònsò ebi awu, kùdi beena tèlòlòjì nè bikwàbò, kàdi dìbà dyákànyi mpindyewu. S’ki maalu à Taatù awu.

Nudi nwela meeji nè bóbò mbafwànyine kuCyàkidila anyi? Mbaswè kwikala bàà kuneemekiiibwa, bàmba nè: “Dìngumba dyètu kadyèna dìtùlongesha Aci to.” Kàdi Bible’s ùdi ùlongesha nànkù. Ncyà bushùwà.

¹⁵³ Nzambi ùdi ùCìshindika nè ncilelèlè. Bushùwà, Cìdi munkaci mwà kuuja cikondo eci, pàdi Bitampi Mwandamutekète. . . Anyi, ànu bwà kushindika nè màngumba àvwa ànu byambudi cyanààna, abu’s mbùmwe bwà ku maalu à Taatù, bwà kushindika. Nè maalu à Taatù mpindyewu mbwà kunùleeja nè màngumba awu kí ngèndè Yèyè to. Ndongolwelu myenza kùdi bantu yidi yivila Dîyi. Cyà bushùwà. Mònaayi’s.

Wèwè udi wamba nè: “Èè, Màriyà, virg-. . . virgò munène awu!”

¹⁵⁴ Ku nkùrusè, Yèyè kààkamubiikilakù nè, “maamù to.” Wàkamubiikila nè, “mukàji,” cyambudi, kí mmaamù to. Nwamònu anyi? Cyà bushùwà, mukàji ùvwa cyambudi cyà Dîyi, kàdi kàvwa Dîyi to. Yèyè ùvwa Dîyi. Kaa, èyowà’s.

¹⁵⁵ Mònaayi, kàbìdi nè, mukàji kàvwa mufwànyikijìibwe mu dibìikà dyà ku lufù pàmwe Nèndè to. Wàkafwà nè wàkabiika ku lufù, bwalu Yèyè ùvwa Dîyi. Mukàji ùvwa ànu cyambudi cyanààna. Wàkafwà, nè ùcìdi ànu mu lukità. Ncyà bushùwà. Pa

nànkù, yéyè ùvwa ànu cyambudi cyanààná, kí mmamwëndè to, kí n'Nzambì to. Yéyè ùvwa ànu cyambudi mùdì maèkèleeziyà amu. Ncyà bushùwà. Cidi cìleeja nè yéyè ùvwa ànu cyambudi cyanààná, kí n'Dìyì to.

¹⁵⁶ Tujikijàayi mu kwamba nùnkù. Kaa, tubemba twà cyena Mpenta, twènda tuseesa tùnyùnguluka bu nkùmbìnkùmbì, yìdya byà pa buloba ànu mùdì mikwàbò yà kùdiyi yènzà amu, “biikàlè nè cimwènekèlu cyà difwàná dyà Nzambì, cikùmbàné bwà kuseeswisha Basungula mene bu nè bìvwa mwà kwenzeka, kàdi bavila Bukolè bwàdì,” mùdì mupròfètà wàmba kaaba aka. Cìleejilu cipwàngàné cyà cìdì Dìyì dyà Nzambì dyàmbè nè neciikàlè mu matùkù à ndekeelu, cikondo cyà èkèleeziyà wa Laòdikiyà, “butakà, mpofo, mwena dikènga, mupèlè, mukèngeledi wa luse, kàdi kàyì mucimanyè to; mwikàlè wàmba mùdiye munène nè mubanji, ‘kàyì dijinga nè cintu nànsa cimwè to.” Kàdi kàyì mumanyè nè mmushintùlùdìibwe mmuumusha ku kabemba, mwanààbò mufwàràngàné nè mupròfètà, bwà kulama Dìyì dyà Nzambì buludì; mmwàndàmùke ciminyì, nè ùdìsha cisàmbà cyèndè nè tùlulù tufwè twà butèndeledi. Aci's ncyà bushùwà menemene. Tàbulukàayi! Ekèlekèlè! Yoyòyò! Mmunyì munùdì nutèkemena bwà kufwànyikijibwa, anyì bapyànyì pàmwè nè mikankù, pàdì bintu byà mùshindù awu mu dìbà dinène edì pàdì Dyambwibwa pabwìpì apa?

¹⁵⁷ Kaa, mwena Kilistò, kaa, mwena kwitabuuja, pawikalà uvwa mwena kwitabuuja wa citùpà, tùngunuka ànu ne kulwa mu masangisha bwà katanci kakesè cyanààná (udikù muswè anyì?), tudi nè cintu kampàndà kaaba aka cìndì ngiitabuuja nè Mukalenge mmuswè bwà wèwè kumanya.

Dìbà dikaadi diyè; ncyèna mwà kuya kule kupìta apu to. Bikèngela ngiimanyikè, nènku pàmwàpa njikijè màalabà dilòòlò. Kàdi, tàngilàayi, twìnyikàayi mitù yètù bwà katanci kakesè cyanààná.

¹⁵⁸ Ncyèna muswè bwà nwènù kutàbaleela mwakulu wùndì ngàakula to, kàdi ndi muswè bwà nwènù kutèya ntèma ànu mu kasunsa kàmwè ku cìmvwà mwambè. Ncitàòke bikùmbàné munùdì mwà kucyùmvwa, ndi mutwìshìibwe, nwènù bajingè bwà kucyùmvwa. Pawikalà kaaba aka dilòòlò edì, kàdi kùyì nè dilabula edì to . . .

Ncyèna ngamba . . . Wèwè udi wamba nè: “Nkàadi mujè maja mu Nyumà, mutùpìke eku nè eku.” Èyowà, tubemba tùdì twènzà cintu cimwècimwè aci, ànu mùtù bikòlòlò nè nkùmbìkùmbì amu. Ncyèna nkonka aci to.

Cyùdì udyà ncinyì? Kùdì upetela cyàkudyà cyèbè cyà bwàcyàbwàcyà nkwepì? Mpenyì paùdì udìila, ku Dìyì dyà Nzambì anyì cintu kampàndà cyà kale cibolè cikaadi cìkwàta naaci mudimu kale wàwa, kùkaadi bidimu nè bidimu? Dilabula dyèbè, nànsa mene dilòòlò edì, dìdì nè cintu

difùmà abu. Mmunyi mwàdyùmvwà bantu bàvwà mwà kuumuka mwab'ewu kuya nè kumòna mene. . . kabìyi nànsa mu yimwè myâkù yà cyena Ngelikà, nè bikwàbò to, kàdi munkaci mwà bufùki bùdi bùtùlongesha Nzambi Mufùki awu. mwà kumòna byambudi byà Dìyi, nè kumòna Dìyi Dyôdi diinè, nè kumanya dibà ditùdi nè mwoyi, nè cikondo cyà dinowa cidi mwab'ewu.

¹⁶³ Nzambi munanga, kùtùlekèdiku twela nyimà ku Dyôdi adi to, bwà dikutakana kampàndà dyà maalu à pa buloba, kàdi dilòlò edi tuMwakidilèku nè mwoyi wètù wònsò. Mukalenge, fùkaaku nyumà mwimpè munda mwànyi, Nyumà wa Mwoyi, bwà ngaamòna mwà kwitabuuja Mèyi Èbè ónsò, nè kwitaba Yesù Dìyi, umweumwe awu makèèlèlè, leelù, too nè kashidi, nè kwitabuuja leelù ewu citùpà cidi cikosela cikondo eci. Enzàku nànkù, Mukalenge. Ndi ndòmba nùnkù mu Dìna dyà Yesù.

¹⁶⁴ Nènku mpindyewu nèndombè muntu nè muntu wa kunùdi, bu munùdi mwab'ewu nè nwela meeji ku cyòci eci, nè meeji matòòke à menemene. Katwèna nè èkèleeziyà wà nwènù kukashààla bàà mwòmù amu to. Tudi nè ciinà cyà mâyi kuntwaku bwà kubàtijiibwamù: “Bûngi bwònsò bwà bààkiitabuuja abu bààkabàtijiibwa,” pawikalà kacya kùyikù mwànji kubàtijiibwa ku dibàtiiza dyà bwena Kilistò to. Aci kî mbwena kwamba nè ndimyanangana dyà mâyi, dipongolwelangana dyà mâyi to; mbwena kwamba nè ku diinyijangana dyà mu mâyi. Kî mmu mwânzù wà Taatù, Mwànà, Nyumà Mwimpè to, kàdi mu Dìna dyà “Yesù Kilistò,” ànu mwàkabàtijiibwà èkèleeziyà mujimà amu, too nè mwàkalwà èkèleeziyà wa Kàtòlikè mu cidimu cyà 303 kubweja nzambi yisàtù nè mishindù yisàtù yà dibàtiiza, mu mwânzù yà búsàtù. Pawikalà kùyi mwànji kupeta aci to, mààlabà mu dindà pa dibà dikùmi jaaaja kùdi mìzàbi nè bikwàbò bikwindile kuntu kwàka.

¹⁶⁵ Kwènàku muswè kulwa bwà kudisanga nè Yesù Kilistò, kî nkudisanga neetù to. Katwèna nànsa nè èkèleeziyà kaaba aka bwà kukukùba to. Ndà ku èkèleeziyà kanà yònsò kùdi muswè kuya aku, mwaba wònsò wùdi mufùmìne awu, kàdi, bu wèwè mwà kuswà, itàbùùjà Dìyi edi. Udi uDìitabuuja anyi? Ambàayi nè: “Amen.” [Disangisha didi dyàmba nè: “Amen.”—Muf.] Nzambi ànùbènèshè. Nudikù mwà kwenza. . .

¹⁶⁶ Kòkù cintu kampàndà citùdi mwà kunùkwàcisha naaci, tudi kaaba aka bwà kucyèza.

¹⁶⁷ Mpindyewu, ndi mumanyè nè kùdi babèèdi kaaba aka. Dibà dyètù dikaadi diyè kule neetù, dilòlò edi, bwà mulongo wà babèèdi. Pàmwàpa netùcipetè, nànsa bìshi. Ndi muswè bwà yònsò wa kunùdi àngenzèlèku cintu kampàndà. Wèwè udi musómbe pabwipi nè muntu kampàndà; tentèkèlè muntu awu byanza.

dyà Yesù Kilistò, swákù bwà bìpatukè mu kasumbù kàà bantu aka. Nènku swákù bwà bìikalè badishikàmine kubangila ànu pa dîbà edi mene, bwà bààmòna mwà kudyà Cyàkudyà cyà Mukankù citùdì twitabuuja nè Wèwè neütütùminè mu lumingu lujimà emu, Mukalenge, utùlamwina Bitampì abi nè utùleeja maalù masokoka àvwà masokoka kacya ku difùka dyà dyulu nè buloba awu, bu mu Wàkalaya. Mbèèbè Wèwè, Taatù. Mu Dîna dyà Yesù Kilistò. Amen.

¹⁷³ Bònsò bàdì bìitabuuja nè bìitaba, imànyìnaayi kuulu, nwambè nè: “Ndi ngiitabuuja. Ndi ngiitaba. Nè cidì Nzambi mundayè aci, ndi ncyàkidila.” [Disangisha didi dijuuka nè dîyi dyà diitaba—Muf.]

Mukalenge ànùbènèshè. Abi’s mbilenga byà dikèma. Muntu yònsò mmwimàne kuulu! Abi’s mbîmpè.

Cyonà cyà: *Ndi muMunangè*. Twîmbàayi musambu ewu kùdîYe pa dîbà adi nè: “Ndi muMunangè, ndi muMunangè bwalu Yèyè wàkannanga kumpalà.” Bònsò cyàpàmwè mpindyewu.

Ndi muMunangè,

Byôbì nàнку, twélàayi byanza byètù muulu.

Ndi muMunangè

Bwalu Yèyè wàkannanga kumpalà

Nè wàkampetela lupàndù

Ku mucì wà Kàlvariyo.

¹⁷⁴ Kaa, Yèyè kî ngwa ùkèmesha anyi? [Disangisha didi dyàmbe nè: “Amen.”—Muf.] Tùlabulanganàayi ku cyanza muntu nè mukwèndè. Mwanèètù Mukankù, kùdimukà ànu cyanààna, mwanèètù wa bakàjì, labùlàngànaayi ku cyanza, patùdì tuwimba apa.

Ndi muMunangè. . .

Mwanèètù Mukankù! Mwanèètù Mukankù! Mwanèètù Mukankù, ukwàcila Dîyi mudimu! Charlie, udi bìshi? Nzambi àkubènèshè, mwanèètù wa balùme. Nè disànkà dyà kukumòna! Nzambi àkubènèshè, mwanèètù wa balùme. Nzambi àkubènèshè, Mwanèètù Mukankù. Nzambi àkubènèshè.

Ku mucì wà Kàlvariyo.

Twélàayi cyàkàbìdì byanza byètù muulu kùdîYe.

Ndi muMunangè, ndi muMunangè

Bwalu Yèyè wàkannanga dyàmbedi. . .

Nè Wàkakwenza wèwè mukankù’s!

Nè wàkampetela lupàndù

Ku mucì wà Kàlvariyo.

¹⁷⁵ Mmunyi muwàmanyà, mmunyi mwàmanyà bàà pa buloba nè udi munangè Yesù? Mpatùdì banangàngàne muntu nè mukwèndè. Mùshindù awu ke wùdì bàà pa buloba. . . Nwamònu’s, Nzambi ùdì ùmòna diitabuuja dyèbè; bàà pa

buloba bàdi bàmonsà cyenzedi cyèbè. Nangàngànaayi muntu nè mukwèndè mpindyewu. Ikàlaayi nè kalolo muntu kùdi mukwèndè. Yikilàngànaayi muntu nè mukwèndè. Ikàlaayi nè lutùlù muntu nè mukwèndè.

Nè kuleeja kwà njila kanà kònsò kutùdi mwà kufila, dibàtiiza, kukèbà kwà Nyumà Mwimpè...Katwèna nè bibambalu kaaba aka bwà kwenzelamù cyôci aci to, nudi bûmvwè's. Dibìikila dyà ku cyoshelu, pìikalà Nzambi mukutwishishe nè Eci ncilelèlè, nè Yesù Kilistò ùdi umweumwe awu makèèlèlè, leelù, too nè kashidi, nè wèwè muswè kudisanga pàmwè Nendè, ndàayi nùbatijiibwè mu Dîna Dyèndè, mààlabà. Nekwikalè bantu kuntwaku bàànùleeja cyà dyenza. Cyònsò citùdiku mwà kwenza bwà kunùkwàcisha aci, netùcyènzè.

Ndi muMunangè, ndi muMunangè

Nwènu bàdi ku nshinga yà tèlèfonè mpindyewu, mu Tucson, lwà mu Californie mwàmwa, lwà ku Esètè kwàka, elàayi byanza byènu muulu, lwà pambèlu pàà...?...MuTùmbishaayi!

Wàkampetela lupàndù

(Nganyì watùtangalaja? Ngacyalùjìdi Mwanèètù Neville...?...) Mpindyewu, too nè mààlabà dilòlò, ndi nnùpèèsha Mwanèètù Neville, mpaasàtà wetù. 

65-0218 Dimiinu Kadyèna Dipyàna Pàmwè Nè Cizubu Nànsha
Parkview Junior High School
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org